

## Yisasife Kanale Ke Maki Kaemalenea Ke

*Ti falene'amatea Yoni'a mono ke huhaleno humaine.*

<sup>1</sup> Yisasi Kalaisi'a Anumaya Kotina ne'amofena kanale kea mage huno aepa hie. <sup>2</sup> Anumaya Koti aune kanoa Aisaiya'a mage huno kaemaleneane Anumaya Koti'a mage huno hie “Haviho ke hamapaisia kano'nia Yisasi aulega hagote'na hutesugeno kana valino hilato hugahie. <sup>3</sup> Ka'me kotegati nago kanomo'a keha keha huno mage hugahie “Anumayamo esia kana ali hilato hutama fatago hiho.” huno humaineane.

<sup>4</sup> Yoni'a ti falene'amatea kanoa eva'yi huno ka'me kotega maineno mage huno hie “Tamakaya tamaku'a aiyahae hutama kefo yatamia ‘Nago'ene ohugahune.’ hutama ataletesage'na tina falelamatesugeno Anumaya Koti'a kefo yatamia aigetamateno atalelamategahie.” huno humaine. <sup>5</sup> Ani yupa Yelusalemu vea'ene Yutia kotega vea'ene Yoni mainelega umaine'ya kefo ya'amihena hufalote hageno Yoni'a Yotani lipi tina falematene.

<sup>6</sup> Yoni'a kemolu afumo ayolagefaleti kena'a faka'nino failineno amu'nofila pulamakamo augafaleti ayetalako huno kilineno kave'a kenu'ene

tumemo tima<sup>1</sup>aene neneane. <sup>7</sup> Mage huno hamapaiye “Nakavela nago kanoa ago egahie. Ani kanoa tusi<sup>1</sup>a tokiya yama<sup>1</sup>a hanea kanogino nagaila ago nagaseno maige<sup>1</sup>na nagaya afa kano mainoanagi<sup>1</sup>na agai aiyale ayesuana onategahie. <sup>8</sup> Nagaya titeti falenelamotoanagino ani kanomo<sup>1</sup>a Anumaya Kotina Alu Aotage Avamu<sup>1</sup>aleti falelamategahie.” huno hie.

*Yoni<sup>1</sup>a Yisasina ti faletene.*

<sup>9</sup> Ani kanafina Yisasi<sup>1</sup>a Kalili kotega hanea kumala Nasaleti kumateti egeno Yoni<sup>1</sup>a Yisasina Yotani lipi tina faletene. <sup>10</sup> Tina falene<sup>1</sup>ategeno Yisasi<sup>1</sup>a tipinagati aivati huno aupa<sup>1</sup>a ageana ikamo<sup>1</sup>a aihagalo higeno Anumaya Koti Alu Aotage Avamu<sup>1</sup>mo<sup>1</sup>a nama kana huno agaitega elavimaine. <sup>11</sup> Elavigeno ikapinagati nagola agea aino mage huno hie “Kagaya nagai<sup>1</sup>ni nafa<sup>1</sup>nemoga kagaifena aluya huno nahau nayamopafi nenagea ne<sup>1</sup>nimoga kagaifena aluya hu<sup>1</sup>na museka<sup>1</sup>a nehue.” huno hie.

*Satani<sup>1</sup>a Yisasina ayevataga humaine.*

<sup>12</sup> Anumaya Kotina Alu Aotage Avamu<sup>1</sup>amo<sup>1</sup>a Yisasina vea<sup>1</sup>ne omai ka<sup>1</sup>me kotega anatino umaine. <sup>13</sup> Umainegeno Satani<sup>1</sup>a\* Yisasife “Havi kava huo.” huno ayevataga higeno foti<sup>1</sup>a (40) yupa Yisasi<sup>1</sup>a ani kotega afela afuyagaene mai-nege<sup>1</sup>ya ensole anaga<sup>1</sup>mo<sup>1</sup>ya meya hu<sup>1</sup>ya kava hutena.

*Yisasi<sup>1</sup>a aepa heno ali<sup>1</sup>yama<sup>1</sup>a alimaine.*

14 Yonina nofi hutenageno Yisasi'a Kalili kotega Anumaya Koti kanale kea mo hamapaiye.  
 15 Yisasi'a mage huno hie “Anumayamo malenea kanamo'a ago eva'yi humainegi Anumaya Koti yagailamatesia kanamo'a aupa'a eva'yi hisia yafe tamakaya tamaku'a aiyahae hutama kefo yatamia ataletetama nagaijena kanale kea humainea kemo'a ‘Tamage humaine.’ hutama tamakupi maletama tamametitia hiho.” huno humaine.

*Yisasi'a fo'a (4) vava ke hige'ya agai akave umainae.*

16 Yisasi'a Kalili ti kotumo agegayalega ne'uno Saimonina agana'amo'ene Etalu'ene anakeana noyame ku'ya neha'a kanolana maine'ana ala kukonogo ti kotupi haga'yu hu'ana nemala'e.  
 17 Yisasi'a mage huno hanapaiye “Nakave e'o. Nakave esa'age'na noyame ku'yama ha'a kava hu'na vava ku'ya hulanategahue.” huno hie.  
 18 Hige'ana aupa'a kukonogo'ania ne'atale'ana Yisasi akave umaina'e.

19 Va'ageno Yisasi'a nago'ene ne'uno Sepetina netalama'amogania Yemesi'ene Yoni'ene tipi kalefi maine'ana kukonogo nefaka'ni'ageno Yisasi'a monake. 20 Anaketeno Yisasi'a ke hige'ana Sepetia ne'anafa'ene ali'ya vava'aene tipi kalefiti ne'amatale'ana Yisasina akave va'e.

*Nago kanomo agu'afiti Yisasi'a Kefo Avamula anatalene.*

<sup>21</sup> Kapaneamu kumate tavite'ya Yisasi'a Sapati yupa mono nopi haino Anumaya Koti ke humavelie. <sup>22</sup> Humaveligeno'a agai kemo'a to'kiya yama'a hanea kanomo ke kana hia yafena tusi'a amama'yo aige'ya mage hae “Nago'a kahegi kema havilinaya anaga'mo'ya nehaya avamete ke nehie.” hu'ya hae.

<sup>23</sup> Anile nago kanoa Kefo Avamu'mo'a agu'afi falemainea kanoa mono nopi emaine. <sup>24</sup> Emaineno ala kenake huno mage hie “Avo Yisasigae Nasaleti kumate nafa'nemoga na'a hulategane? Tagaila tahaeka falilategahe emainano? Nagaya kagaifena ago havimainoe kagaya alu aotage kanoa Anumaya Koti hugatenea kano mainane.” huno hie. <sup>25</sup> Higeno Yisasi'a Kefo Avamufena tokiya'age ke huno mage hie “Kea ohuka maiyo. Mani kanoa ataleka agusafinagati vuo.” huno hutene. <sup>26</sup> Higeno ani Kefo Avamu'mo'a moyege meyege huteteno kasageke hia kava huteteno alakenake huno agusafiti ataleno hatilavimaine. <sup>27</sup> Vige'ya muki'a vayala amama'yo aige'ya huge havige hu'ya mage hae “Na kava nehie? Na augafa haekafa ke nehie? Tusi'a to'kiyaleti anumaya'age ke hige'ya Kefo Avamu'mo'ya agai kea ali hipo'ya hu'ya hatilavi'ya vae.” hu'ya hae. <sup>28</sup> Hageno Yisasi'ma humainea avagemo'a muki'a Kalili kotega ute ete hige'ya muki'a vea'mo'ya havimainae.

*Yisasi'a Pitana a'amona ita'amo alekanoa kali'a alino kanale hutene.*

<sup>29</sup> Yisasi'a Yemesi'ene Yoni'ene mono nona atale'ya anileti Saimonigani Etalugani nopinaga umainae. <sup>30</sup> Umainageno Saimonina a'amona ita'amo alekanao amukonako kali ne'aligeno Yisasi'a uva'yi hige'ya aup'a ani alekanohe Yisasina hapaimainae. <sup>31</sup> Hapaigeno Yisasi'a agaite eno ayate alino hetitegeno amukonako kali'amo'a agola kanale hutegeno kavela kaeno amamine.

*Yisasi'a muki'a kali veala alino kanale humatene.*

<sup>32</sup> Unena yagea tavifalegahe hige'ya vea'mo'ya kasago'ya kali vea'nea Kefo Avamu'mo'ya amaku'afima ali haviya nehia vea'nea Yisasite amavale'ya emainae. <sup>33</sup> Muki'a ani kumate veala fiate elitalu humainae. <sup>34</sup> Yisasi'a havigu havagu kali ne'aliya vea'nene ali hilato humateno muki'a Kefo Avamu'mola amaku'afiti amanatitalege'ya Kefo Avamu'mo'ya Yisasina ago'ma agemainaya yafe Yisasi'a mage huno hamapaiye “Mani yafena kea ohiho.” huno hamapaiye.

*Yisasi'a Kalili kotega ali'ya alino vaiyemaine.*

<sup>35</sup> Natena tani kotigeno Yisasi'a hetino ani nona ataleno vaya omai kotega umaineno nuna-muna humaine. <sup>36-37</sup> Umainege'ya Saimoni'ene nago'a anaga'amo'yaene agaife aiyaka mae'ya agaitega u'ya mage hu'ya mo hae “Muki'a vea'mo'ya kagaifena katine'ayae.” hu'ya hapaiye. <sup>38</sup> Hapaigeno Yisasi'a mage huno hamapaiye. “Alu kumate kumate vigetao nagaya

mono kea mo hamapaigahue. Mono kema hampaisua yafe nagaya emainoe.” huno hamapaiye.  
<sup>39</sup> Muki'a Kalili kotega via'yamo mono nopi Anumaya Koti kea hamapaino Kefo Avamula vea'mogami amaku'afiti amanatitalene.

*Yisasi'a fugita kano alino kanale hutene.*

<sup>40</sup> Nagola fugitayamo augafa alino ha'yagino atalako humainea kanomo'a Yisasite mepe huno mage huno hapaiye “Kahaisigekasina nagaila ago ali hilato hunatate'asine.” huno humaine.  
<sup>41-42</sup> Higeno Yisasi'a kalagi aiteteno ayana ha'yo huno augafale avate nehuno mage huno hie “Nahaige'na kaugafamo'a menia kanale hino hu'na nehue.” huno higeno anile aupu'a kali'amo'a ha'no hutene. <sup>43-44</sup> Ha'no hutetegeneno Yisasi'a mage huno hapaiye “Aupa'a visana'amoga ali hilato hugatoa yafena nago kanoa ha'opaika mono nopi kava kanomote uka muki'a veala kalika'ama ali'na kanale hugatoa kema havinu'yahena mono nopi kava kanomo'a kaugafa kamota huno kagetesigeka kaugafama ali kanale hugatoa yafena Mosese'a ‘Ma yama Anumaya Kotina amio.’ huno humainea yana Anumaya Kotina momio.” huno to'kiya'age ke hapaiye.  
<sup>45</sup> Hapaiyanagi ani kanomo'a via'amo kanale'ma hutea avagea alu kumate kumate hamapaige'ya kasago'ya vea'ne havite'ya “Kalitia alino kanale hulatesie.” hu'ya Yisasite emainae. Aya yafe Yisasi'a fufu'yate visia kana omalegeno amataleno vaya omai kotega umainege'ya alu kumateti kumateti veala Yisasite emainae.

## 2

*Yisasi'a aiya aya falimainea kano alino kanale hutene.*

<sup>1</sup> Yisasi'a aupa kana kano'a maiteno Kapaneamu kumate eteno noma'afi "Emaine." haya kea vea'mo'ya havimainae. <sup>2</sup> Havite'ya vea'mo'ya melitalu hageno noma'afi'ene nosi'mekaenena hiya hige'ya nago'a veala fiategaenena maisaya yana omalegeno Yisasi'a Anumaya Koti kanale mono kea hamapaiye. <sup>3</sup> Hamanepaige'ya fo'a (4) vaya'mo'ya nago kanoa aiya aya falimainea kanoa hagifanale avale'ya faetete'ya Yisasite avale'ya ae. <sup>4</sup> Ayana kasago'ya vea hiya haya yafe kana omalege'ya nogatofulega haite'ya Yisasi maineama'aleti hanae yosa alisaga humalene'ya ani hagifanale kali kanoa atalageno Yisasina avate elavimaine. <sup>5</sup> Elavigeno Yisasi'a "Ma vaya'mo'ya nagaife havi'ya amakupi male'ya amametiti hae." agesa haviteno kali kanohe mage hie "Nafa'ne'nimoga nagaya kahanepauve ago aigekate'na kefo yaka'a atalegatoe." huno hapaiye.

<sup>6-7</sup> Hige'ya kahegi kema havilinaya anaga'mo'ya anile mopale emaine'ya amakai'ami amaku'afiti mage hae "Na'a higeno mani kea nehie? Ma kanomo'a Anumaya Kotifena huhaviya hune'ate. Nago'a vaya'mo'ya aigetate'ya kefo yatia ataleotategahayanagi Anumaya Koti'a agai'age aigetateno kefo yatia atalelatesia kanoa maine." hu'ya hae.

<sup>8</sup> Hageno Yisasi'a aupa'a amaku'afinaga haviya

kea agupi ago haviteno mage huno hie “Na'la higetama mani kea tamaku tamakesafinaga nehaviye? <sup>9</sup> Nagayama hu'na hisua kea hana kemo kana'agela humane? ‘Aigekate'na kefo yaka'la atalenegatoe.’ hu'na hisua kemo'o? Ifi kali kanomofe ‘Hetika hagifanaka'la alisaga hulika vuo.’ hu'na hisua kemo'o? <sup>10-11</sup> Nagaya ikapinagati emainoa kanoa vaya'mo natenea kanomo'na ma mopale maine'na kefo yafe aigetamate'na kefo yatamia atalelamatesua tokiya'nia hanea yafema havisaya yafe nago kavala hu'na tamaveligahue.” nehuno kalima alia kanohena mage huno hie “Hetika hagifanaka'la ne'alika nokalega vuo.” huno hapaiye. <sup>12</sup> Higeno ani kali kanomo'la aupa'la muki'la vea amaulagafi hetino hagifana'la ne'alino hatilavimaine. Hetino via yafe muki'la melitalu hu'ya mainaya vea'mo'ya tusi'la amama'yo aige'ya Anumaya Koti agia alisaga nehu'ya mage hu'ya hae “Menia ma yupa no'agona tokiya'age yana ne'agone.” hu'ya hae.

*Yisasi'la Livaife ke humane.*

<sup>13</sup> Yisasi'la amataleno Kalili tikotumo agegay-alega ne'vige'ya muki'la vea'mo'ya agaitega molitalu hageno Yisasi'la humavelie. <sup>14</sup> Vilegati nago kanoa mogeana ani kanomo agia Livai'e Alafiusi nafa'nea mogeanagi Livai'la musufa ya huno vaya amaugafaleti takisi mone aliliteno nehia kanogino opisi noma'ale mopale mainegenon Yisasi'la ani kanoa mogeteno mage huno hapaiye



“Kagaya nakave eno.” huno higeno Livai'a hetino Yisasina akave umaine.

<sup>15</sup> Haenaga Yisasi'a Livaina noma'afi kave mo nenege'ya muki'a musufaya hu'ya amaugafaleti takisi mone ne'aliya vaya'ene nago'a kefo yama nehaya vaya'ene Yisasi'ene tokae'ya nemaiya anaga'mo'yaene ani nopina tokae'ya maine'ya kavela nene. Ani yupa kasago'ya vaya'mo'ya Yisasi kea havite'ya akave umainae. <sup>16</sup> Yisasi'a ani kefo yama nehaya vaya'ene vaya amaugafaleti takisi miya ne'aliya vaya'ene kave nenege'ya nago'a kahegi kema havilinaya Falasia vaya'mo'ya mogete'ya Yisasi'ene tokae'ya nemaiya anagafe mage hu'ya hae “Na'a higeno Yisasi'a amaugafaleti takisi monema ne'aliya vaya'ene kefo yama nehaya vaya'enena kavela nene?” hu'ya hamavigae. <sup>17</sup> Hamavigageno Yisasi'a ani kea ago haviteno kenona'amia mage huno hamapaiye “Afa'a kalima no'aliya vea'mo'ya tota kanalega o'ugahagi kali veake tota kanalega ugahae. ‘Fatago vea mainone.’ hu'ya nehaya veafe ke hugahe nagaya omenogi kefo yama nehaya veafe ke hugahe emainoe.” huno hie.

*Yisasi'a kave'ma monesiya yafe humaine.*

<sup>18</sup> Nago yupa Yoni'ene tokae'ya nemaiya anaga'mo'yaene Falasia vaya'mo'yaene\* kave monesiya yafe nago'a vayala Yisasite e'ya mage hu'ya havigae “Na'a hige'ya Yoni'ene tokae'ya nemaiya anaga'ene Falasia vaya'ene kavela mosi'ya nemaiyanagi kagai'ene tokae'ya

nemaiya anaga'mo'ya kavela nege nege hu'ya nemaiye?" hu'ya hae. <sup>19</sup> Hageno Yisasi'a mage huno hie "Nago kanomo a'ma fai'ya esageno avaya heno nesia imu kisia yupa vaya'amo'yaene to'kae'yama maisayana ani vaya'mo'ya kavela mosisao? A'ao ani kanoa maineanagi'ya mo'osigahae. <sup>20</sup> Mo'osigahagi haenaga alu kana falote hisige'ya kame vayamo'ya a'ma alisia kanoa atafa hu'ya amakaipiti avalesage'ya ani kanafina mainesaya vaya'amo'ya hamau hutete'ya mosigahae.

<sup>21</sup> Nago kanomo'a haegafa kena alino atafa kenalela maleno ohatigahie. Maleno hatisiana haegafa kenamo'a taga huno ali haviya hugahie. <sup>22</sup> Nago kanomo'a haegafa nofi alagamo tima'a takino atafa mememo augafa ti ke'ayopina otakigahie. Takisiana ani limo'a ka'nuka hesigeno ti kena falo huno takilavinageno ani li'ene ke'ayo'ene ali haviya hugahie. Haegafa nofi alagamo tima'a hefino haegafa meme augafamo ti ke'ayopi takino vaino." huno humaine.

*Yisasi'a Sapati yupa ali'yama no'aliya yafe humaine.*

<sup>23</sup> Nago Sapati yupa Yisasi'ene agai'aenema tokae'ya nemaiya anaga'ene atili hoyafi ne'u'ya atilia kalemmainae. <sup>24</sup> Negalage'ya nago'a Falasia vaya'mo'ya agete'ya Yisasife mage hu'ya hae "Ago Sapati yupahena nagalu humalenaya kea ne'atagayae." hu'ya hae.

<sup>25</sup> Hageno Yisasi'a mage huno hie "Tamakaya Teviti'a agai'ma avagi hu'ya vaya vaya'ene

amakatege<sup>1</sup>ya humainaya yafena nayoma kae-malenaya kea hapalitama ohavinayanagitama nehao? <sup>26</sup> Amakategeno Anumaya Koti nopi haino afa vaya<sup>1</sup>mo<sup>1</sup>ya onegahae mono note kava vayala\* amakai<sup>1</sup>amige negahae.’ hu<sup>1</sup>ya nagalu humalenaya kavela Anumaya Koti aula-gale malenaya kaihame maya Teviti<sup>1</sup>a neneno tokae<sup>1</sup>ya umainaya vaya<sup>1</sup>aene amamige<sup>1</sup>ya ne-mainae.” huno humaine. Ani kanafina Apiata<sup>1</sup>a ala mono note uhagote mainea kava kano mainea kanafine.

<sup>27</sup> Yisasi<sup>1</sup>a Falasia vayafe mage huno hamapaiye “Vaya<sup>1</sup>mo<sup>1</sup>ya maifalu hisaya kana Anumaya Koti<sup>1</sup>a Sapati kana talo humalenegi vea<sup>1</sup>mo<sup>1</sup>ya ani kanamona atafa hisaya yafe veala talo ohune. <sup>28</sup> Ikapinagati emainoa kanoa vaya<sup>1</sup>mo natenea nafa<sup>1</sup>nemo<sup>1</sup>na Sapati kanamona kava yagaimainoe.” huno hie.

### 3

*Sapati yupa Yisasi<sup>1</sup>a aya falimainea kanoa alino kanale hutene.*

<sup>1</sup> Yisasi<sup>1</sup>a nago yupa mono nopi haino mainegenonago kanoa ayamo falimainea kanoa anile maine. <sup>2</sup> Mainege<sup>1</sup>ya nago<sup>1</sup>a vaya<sup>1</sup>mo<sup>1</sup>ya Yisasi<sup>1</sup>ma havi kava<sup>1</sup>ma hisiafene hu<sup>1</sup>ya amata hu<sup>1</sup>ya mainageno “Yisasi<sup>1</sup>a Sapati yupa ani kali kanoa alino kanale hutesio.” hu<sup>1</sup>ya Yisasina amata hu<sup>1</sup>ya mainae. <sup>3</sup> Amata hu<sup>1</sup>ya mainageno Yisasi<sup>1</sup>a ayama falimainea kanomofe mage huno hapaiye “Hetika vaya amu<sup>1</sup>nopi me hetio.” huno

hapaiye. <sup>4</sup> Hapaiteno Yisasi<sup>1</sup>a amata hu<sup>1</sup>ya maiya vayafena mage huno hie “Tamahavigoe Sapati yupama hisaya yafena mono kemo<sup>1</sup>a na<sup>1</sup>ane humaine? Sapati yupa vayala ali<sup>1</sup>ya kanale humategahao ifi ali haviya humategahae? Sapati yupa veala amavale<sup>1</sup>ya avina me matesao ifi veala tavata hamaegahae?” huno hamavigege<sup>1</sup>ya kea ohu<sup>1</sup>ya mainae. <sup>5</sup> Kea ohu<sup>1</sup>ya maigeno Yisasi<sup>1</sup>a muki<sup>1</sup>a vaya amaulagafi moge mege hiana muki<sup>1</sup>amogami amaku<sup>1</sup>mo<sup>1</sup>a atalako hia yafe aipamo<sup>1</sup>a kana higeno kali kanomofe mage huno hapaiye “Kayana aipi huo.” huno higeno aipi hiana ayamo<sup>1</sup>a kanale hutene. <sup>6</sup> Kanale<sup>1</sup>ma hutea yafena Falasia vaya<sup>1</sup>mo<sup>1</sup>ya mono nona ne<sup>1</sup>atale<sup>1</sup>ya Heloti vaya<sup>1</sup>ene alitalu hu<sup>1</sup>ya huge havige hute<sup>1</sup>ya “Yisasina hana<sup>1</sup>a huta haesunageno falisie.” hu<sup>1</sup>ya vege humainae.

*Yisasite kasago<sup>1</sup>ya veala ti agegayale melitalu humainae.*

<sup>7-8</sup> Yisasi<sup>1</sup>ene agai<sup>1</sup>aenema tokae<sup>1</sup>ya nemaiya anaga<sup>1</sup>aene Kalili ti kotumo agegaya ne<sup>1</sup>vage<sup>1</sup>ya kasago<sup>1</sup>ya vea<sup>1</sup>ne Kaliliti akave vae. Yutiati<sup>1</sup>ene Yelusalemuti<sup>1</sup>ene Itumeati<sup>1</sup>ene Yotani tifaligati vea<sup>1</sup>nene Taiyati<sup>1</sup>ene Saitoniti<sup>1</sup>ene muki<sup>1</sup>a veala Yisasi<sup>1</sup>ma hia avage<sup>1</sup>a havite<sup>1</sup>ya agaitega vae. <sup>9</sup> Ne<sup>1</sup>vageno agai<sup>1</sup>aenema tokae<sup>1</sup>ya nemaiya anagafe mage huno hamapaiye “Muki<sup>1</sup>a alitalu haya vea<sup>1</sup>mo<sup>1</sup>ya nagaila ayenatunefayafe tipi kalea talo tala hunateho.” huno hie. <sup>10</sup> Kasago<sup>1</sup>ya veala kali<sup>1</sup>amia alino kanale humatea yafe muki<sup>1</sup>a kali vea<sup>1</sup>mo<sup>1</sup>ya Yisasi augafale avate

hugahe ayetufeli'ya vae. <sup>11</sup> Ne'vage'ya Kefo Avamu'mo'ya vea amakusafi maine'ya agete'ya Yisasina aulegati mopafi amako'ya meye'ya ala kenake hu'ya mage hae “Kagaya Anumaya Kotina nafa'ne'amoga mainane.” hu'ya hae. <sup>12</sup> Hageno Yisasi'a tokiya'age ke huno mage hie “Ani kea nago'a veala hamaopaiho.” huno hamapaiye.

*Yisasi'a agai'a tuelufu'a (12) anaga'a hapalimatene.*

<sup>13</sup> Yisasi'a ago'yafi haiteno haiya vayafe ke hige'ya emainae. <sup>14-15</sup> Ageno ani vayapiti tuelufu'a (12) vaya hapalimateteno agai'aenema tokae'ya maisaya yafe'ene agai kema huhale'ya hisaya yafe'ene hapalimatene. Hapaliteno tokiya'a ne'amamino Kefo Avamula vea'mogami amakusafiti amanatitalesaya yafe'ene hapalimatene. Mage huno hamapaiye “Nagai kema havige'na hulamatoa vayala (Aposolo vaya)\* maiho.” huno hapalimatene. <sup>16</sup> Ani tuelufu'a (12) anaga'mogami amakia Saimoni'e kanomo agia Yisasi'a Pita'e huno malene. <sup>17</sup> Yemesi'ene agana'amo'a Yoni'ene Sepetina ne'amogania Yisasi'a anakia Poanesi'e huno malene. Ani anakimo'a tagai kefina monagemo'ma hia avamete hu'ana tokiya'age ke neha'a kanolatane huno anakia malene. <sup>18</sup> Etalu'e Filipi'e Patolomiu'e Matiu'e Tomasi'ene Yemesi'a Alafiusi nafa'nene Tatusi'ene Saimonina hamo'amo'a nago agia Seloti'e. <sup>19</sup> Yutasi Isakalioti'a Yisasina haenaga'a

agesi huno kame vaya amayapi avaleno atesia kanoe.

*“Yisasi'a Pielesepulimo tokiyaleti ali'yana ne'alie.” hu'ya humainae.*

<sup>20</sup> Yisasi'a noma'alega umainege'ya muki'a veala Yisasite elitalu hageno Yisasi'aene tokae'ya nemaiya anaga'ene kave negahe haya yapi veala mehiya hage'ya onenae. <sup>21</sup> Agai'a konaga afamo'amo'ya havite'ya Yisasife “Aifonafo nehie.” hu'ya Yisasina avalegahe emainae.

<sup>22</sup> Yelusalemu kumateti kahegi kema havilinaya anaga'mo'ya Yisasife mage hu'ya mehae “Kefo Avamu'ma kava humainea kanoa Pielesepulimo'a agupi maineno tokiya amigeno Kefo Avamula anatine'atale.” hu'ya humainae.

<sup>23</sup> Hageno Yisasi'a haviteno “Nagaite eho.” huno ke hige'ya ageno avame kefiti mage huno hamapaiye “Satani'a hana'a huno Satanina anatatalegahie? <sup>24</sup> Nagoke kotega vea'mo'ya ali fako hu'ya “Alu vea mainone.” hu'ya tuma hisayana ani kotega vea'nenena ha'no hugahae.

<sup>25</sup> Nagoke afamo'mo'ya ali fako hu'ya “Alu anaga mainone.” hu'ya tuma hisayana ani afamola ha'no hugahae. <sup>26</sup> Ha'no hugahagi Satani anaga'mo'ya ali fako hu'ya “Alu vaya mainone.” hu'ya hisayana Satani kava yagaisia tokiya'a omalegahanagino haviya huno ha'no hugahie.

<sup>27</sup> Nagola tokiya kanomo'a noma'afima yagaino mainesigeno'a nago kanomo'a musufa yama hugahe vinuno'a hagoteno ani

tokiya kanomona nofiteti kitalako huteteno afeno'yama'a musufa yana hugahie.

28-29 Na'a humaineafe nagaya tamage hu'na tamahanepauve vea'mo'ya muki'a alu kefo yama alu kefo ya'ene huhaviya humate ya'ene hisayana Anumaya Koti'a aigetamateno kefo yana atalelamategahianagi nago'a vea'mo Alu Aotage Avamufema huhaviya hutesayana Anumaya Koti'a aigeo'amategahianagi ani kefo yama'a hanege hanege huno hanegahie.” huno humaine. <sup>30</sup> Hige'ya “Kefo Avamu'mo'a Yisasi'na agupi maine.” hu'ya haya kehe Yisasi'a ani kea huno hamapaiye.

*Ta'ya                      Yisasina                      ita'amo'yaene  
agana'amo'yaenena mainae.*

<sup>31</sup> Yisasina ita'amo'ene agana'amo'yaene e'ya kumatega me heti'ya maine'ya nago kanoa hutageno Yisasife ke hie. <sup>32</sup> Ke hige'ya muki'a veala elitalu hu'ya Yisasina aiyafi mopale maine'ya agaife mage hu'ya hae “Itakamo'ene kaganakamo'yaene kumatega emaine'ya kagaife ke nehae.” hu'ya hapaiye. <sup>33</sup> Hapaigeno Yisasi'a mage huno hie “Ita'nimo'ene nagana'nimo'ya ta'ya mainae?” huno hamavige. <sup>34</sup> Hamavigeno agai'enema mopale mainaya veala momake memake huno amaketeno mage huno hie “Ita'nimo'yaene nagana'nimo'yaenena ma ma nagai'ene mopale mainae. <sup>35</sup> Anumaya Koti kema havite'ya haiya kava'ma nehaya

veala ita'nimo'ya nagana'nimo'ya nasa'nimo'ya mainae.” huno hie.

## 4

*Nago kanomo'a hoyafima avina nefaiya yate Yisasi'a avame kea humaine.*

<sup>1</sup> Yisasi'a tikotumo agegayalega umaineno nago'ene humavelige'ya kasago'ya vea'nea agaite elitalu hu'ya yage'yage haya yafe tipi kalefi haisaga humaino mopale maiteno ti amu'nopi umainege'ya yage'yage haya vea'mo'ya ti agegayalega heti'ya mainae. <sup>2-3</sup> Heti'ya mainageno Yisasi'a alu ke alu kea avame kefiti mage huno hamapaiye “Haviho nago kanomo'a avina hanaigahe vie. <sup>4</sup> Avina yama'a alino aihelafino nehanaigeno nago'a avinamo'a kapi tavino hanege'ya namayagamo'ya me ne'ya ha'no hae. <sup>5</sup> Nago'a avinamo'ya yafa mopafi tavite'ya osi'a mopa hanea yafe aupa'a hagemainae. <sup>6</sup> Hagayanagi yagemo'a teno amukonako higeno hafu'ya omalea yafe fayote'ya asagaliye. <sup>7</sup> Nago'a avinamo'a avetanafa inomo amu'nopi tavino hageteno avetanafa ino'ene tokae'ana haitete'ana avetanafa inomo'a ayetegen haviya higeno alaga'a falote ohune. <sup>8</sup> Falote ohunegi nago'a avinamo'a kanale mopafi tavino hageteno ala huno alaga ayeana nago'a avinamo'a teti'a (30) alaga ayegen nago'a avinamo'a sikisiti'a (60) alaga ayegen nago'a yosalela kasago'ya vani hataleti'a



(100) alaga ayeno vasaimai vasaimai humaine.  
 9 Tamakesama hanesigetama havilama hutama haviho.” huno hie.

*Yisasi'a na'ane agesa hanegeno avame kege' yana humaine.*

10 Muki'a veala utage'ya agai'a tuelufu'a (12) anaga'amo'yaene nago'a vea'ene ani avame kemonana aepa'ahe havigae. 11 Havigageno Yisasi'a mage huno hamapaiye “Tamakaila Anumaya Koti'a kava yagailamatenea yafe falakimainea kea Anumaya Koti'a tamaya hinagetama havigahagi nagai kema nohaviya veala avame keke'ya hamanepauve. 12 Ani vea'mo'ya ageme geme nehayanagi agelama hu'ya o'agegahae. Havime havime nehayanagi havilama hu'ya ohavigahae. Havilama ohisaya yafe avame kea hamanepauve. Havigu havilama hu'ya amaku'a aiyahae hisageno Anumaya Koti'a aige'amateno kefo ya'ami atalemateyafe nehue.” huno hie

*Avinamote avame kea huhaleno hie.*

13 Yisasi'a mage huno hie “Mani avame kea havilama ohunao? Muki'a avame kea hana'a hutama havigahae?” huno hie. 14 Avina yama hanaigahe via kanomo'a Yisasife kanale mono kea nefaiye. 15 Nago'a vea'mo'ya kapi tavi-mainea avinamo avamete mainageno kanale kea faimalegeya maine'ya Anumaya Koti kea haviyanagi amakupi omalesaya yafe Satani'a amakupitila ani kea melitalene. 16 Ani'a huno yafa mopafima tavimainea avinamo'a ma'a humaine nago'a vea'mo'ya Anumaya Koti kea

havi'ya aupa'a atafa hute'ya muse hae. <sup>17</sup> Muse hayanagi hafu'yamo'a mopafi otavinea yamo'a alige atalege vea'ne maine'ya osi kana kano'a osi'a havi'ya amakupi maletageno havi kanama falote nehiano Anumayamo kema haviya yafe vea'mo'ya ali haviya humatesaya kanamo'ma amakaite falote nehiano aupa'a Anumaya Koti kea ne'atalae. <sup>18-19</sup> Nago'a avina avetanafa hanea inomo agusafi tavimainea avinamo'a ma'a humaine nago'a vea'mo'ya Anumaya Koti kea havite'ya ma mopafi muki'a ya'yaga'amihena amakesa havi'ya mone'amima yokalo'amihena kalagi aige'ya ani ya'yagamo'a Anumaya Koti kea ali'ya ayetalako hute'ya atalageno alaga aye helafino tama nohie. <sup>20</sup> Tama nohianagi kanale mopafima tavimainea avinamo'a ma'a humaine nago'a vea'mo'ya Anumaya Koti kea havi'ya amakupi malageno ani alaga muki'a aye henelafie. Nago'a vea'mo'ya nagoke avina yosalela teti'a (30) alaga ayemainae. Nago'a vea'mo'ya nagoke avina yosalela sikisiti'a (60) alaga ayemainae. Nago'a avina yosalela vani hataleti'a (100) alaga ayemainae." huno humaine.

*Vea'mo'ya lamua hanagali'ya sipale kapinaga nomalae huno humaine.*

<sup>21</sup> Hamapaiya yafe Yisasi'a mage huno hamavige "Nago'a vea'mo'ya lamua hanagali'ya susufaneletila aiso hunemalao ifi sipa kapinaga hanagali'ya aiso hunemalae? A'ao aihalesia yafe sipale hanagali'ya nemalae. <sup>22</sup> Haenaga'a muki'a

falakimainesia yamo<sup>1</sup>a efalote hugahie. Muki<sup>1</sup>a kesi kava nehisaya yamo<sup>1</sup>a efalote hinage<sup>1</sup>ya vea<sup>1</sup>mo<sup>1</sup>ya agegahae. <sup>23</sup> Tamakesama hanesimogatama havilama hutama haviho.” huno hie.

<sup>24</sup> Huteno mage huno hie “Anumaya Koti kema havisaya yafena tamakesa havilama hutama haviho. Havisaya kea akave malesageno nago<sup>1</sup>a kene tamahapaisigetama havigahae. <sup>25</sup> Havilama huno havilinesia kanomona Anumaya Koti<sup>1</sup>a nago<sup>1</sup>ene havisia yana amigahianagi ‘Ago havilinoe.’ huno nehisia kanomona havilinesiamama<sup>1</sup>a hafalegahie.” huno hie.

*Avina yamo<sup>1</sup>ma nehagea yate avame kea humane.*

<sup>26-27</sup> Yisasi<sup>1</sup>a mage huno hie “Anumaya Koti kava yagaimainea yamo<sup>1</sup>a ma<sup>1</sup>a humane. Nago kanomo<sup>1</sup>a avina yana hoyafi hanaemaleteno kegela mo faeteno feluga hetiteno huge hugeteana ani avinamo<sup>1</sup>a hana<sup>1</sup>a huno falote huno ala nehia yamona aepa<sup>1</sup>a ani kanomo<sup>1</sup>a o<sup>1</sup>agene. <sup>28</sup> O<sup>1</sup>agenegi afa<sup>1</sup>a mopamo<sup>1</sup>a agai<sup>1</sup>age<sup>1</sup>ya nuna amigeno aifalo huno hageteno haisa falote huteno haenaga alaga ayeno afu nele. <sup>29</sup> Akavi huteno afuma nelea kanamo<sup>1</sup>a ago eva<sup>1</sup>yi hia yafe aupa<sup>1</sup>a via<sup>1</sup>yamo naepeleti hataga humane.

*Masatati avina yosamote avame kea humane.*

<sup>30</sup> Yisasi<sup>1</sup>a mage huno hie “Anumaya Koti<sup>1</sup>a kava yagaimainea yamo<sup>1</sup>a hana<sup>1</sup>a maine? Na<sup>1</sup>ane hu<sup>1</sup>na ma<sup>1</sup>a huno hane hu<sup>1</sup>na avame kefitila tamahapaisue? <sup>31</sup> Ma ma osi alagamo hia

avamete humane. Ani alagamo agia masatatie. Ani osi osi alagamo'a nago'a yosalagama negaliya yosalagamo'a agaseno osi kano'a hane. <sup>32</sup> Osi osi humaneanagi kalimaletegenohageno haiteno ala yosagefa haino muki'a hoyafima hanea yosayaga amakaseno aya'aya humanege'ya namayagamo'ya akopatela no'amia me negiye." huno hie.

*Yisasi'a avame kege'ya humane.*

<sup>33</sup> Yisasi'a ani'a huno kasago'ya avame kea alumo alumo huno amakupima havisaya avamete kea hamapaiye. <sup>34</sup> Yisasi'a vaya'yagaene maineno muki'a kema hamapaiya kea avame kege'ya hamahapaiyanagi agai'aenema tokae'ya nemaiya anagala amahaote mainageno hufalote huno hamapaimaine.

*Yisasi'a ala yasimofe higeno taga humane.*

<sup>35</sup> Ani yupa yagemo'a tavifalegahe higeno Yisasi'a agai'aenema tokae'ya nemaiya anagafe mage huno hie "Tikotumona atu faliga vigetao." huno hamapaiye. <sup>36</sup> Hige'ya muki'a elitalu humainaya veala ne'amatale'ya tipi kalefi haisaga humai'ya Yisasina avale'ya vageno nago'a tipi kaleyagamo'ya agai tipi kalene tokae'ya vae. <sup>37</sup> Ne'vageno tusi'a yasimo'a alino timona aikalato kalato huno tipi kalefi atalegeno tipi kalefi havategahe hie. <sup>38</sup> Havategahe higeno Yisasi'a tipi kalemona akavelega tala yosale afito aino faemanege'ya agafa hu'ya mage

hae “Hulavenelina kanomogae tikotupi asaga hulavita ti nakaita falisunageka kahauna huotategano?” hu'ya hae.

<sup>39</sup> Hageno Yisasi'a hetino ani limofe'ene yasimofe'enenena tokiya'age ke huno “Taga huo.” higeno yasimo'ene timo'enenena taga hu'ana alava humaina'e. <sup>40</sup> Alava higeno Yisasi'a agai'aenema tokae'ya nemaiya anagafe mage huno hie “Na'a higetama kolia nehae? Nagaife havitama tamakupi maletama tamametiti nehaya yamo'a kale'yo humaineo?” huno hamavige. <sup>41</sup> Hamavigege'ya amama'yo aite'ya huge havige hu'ya mage hae “Ma kanoa ta'e? Yasimo'ene timo'ene agai kea havite'ya akave nemalae.” hu'ya hae.

## 5

*Yisasi'a aifo kanomo agusafiti Kefo Avamula anatitalene.*

<sup>1</sup> Kalili ala tikotuna takae'ya ame agegayamona Kelasa\* vea mainalega uva'yi hae. <sup>2</sup> Yisasi'a ani tipi kalea ne'ataleno ti agegayalega ne'vigeno nago kanomona Kefo Avamu'mo agupi mainea kanomo'a matimatipinagati Yisasite emaine. <sup>3</sup> Ani kanoa yafakapinaga noma'a hanegenon anifinaga mainege'ya tokiya'age seni nofiteti kitesaya vayala omainae. <sup>4</sup> Vaya'mo'ya seni nofiteti aiya aya'ene kisalu kimalenageno ani nofila aigalu hene'ataleno aiyafi nofila yafateti ailatapegeno nofila aika'no higeno “Ako huka maiyo” hu'ya hapaisaya tokiya'amima

hanea vayala omainae. <sup>5</sup> Omaigeno ani kanomo'a nate'ene kege'ene efi efi huno matimatipinagaene ago'yale'ene maineno tusi aviteno avovo nehuno yafateti agai'a augafa aige talaga talagoma humainea yamo'a amumo'a tusiya humane.

<sup>6</sup> Ani kanomo'a Yisasina aya'ayate ne'legeno ageteno aiyayeno eno aiyafi ale'ya meyeno mopafi maineno alisoso hune'ate. <sup>7-8</sup> Yisasi'a mage huno hie “Kefo Avamu'mogae agusa-finagatila hatilavio.” huno hutea yafe ani kanomo'a ala kegefafiti mage huno hie “Yisasi-gae, ago tagaseno anale mainea Anumaya Kotina ne'amogae, na'a hunategahe nehane? Museka'a nehugi nagata aisia kavala huonato.” huno hie.

<sup>9</sup> Higeno Yisasi'a ani kanohena mage huno hie “Kagai kagia tagae?” huno havigegenon “Nagia Kasago'ya-mo'nae. Muki'a Kefo Avamu'mo'ya nagupi haifale'ya mainaya yafe nagia Kasago'yamo'nae.” huno hie. <sup>10</sup> Huteno Yisasifena mage huno hie “Museka'a nehue ma kumatetila Kefo Avamula humatesanage'ya alulega o'visae.” huno hie.

<sup>11</sup> Nehige'ya kasago'ya afuyagamomo'ya ago'yafi maine'ya kave nena. <sup>12</sup> Nenage'ya Kefo Avamu'mo'ya Yisasife mage hu'ya havigae “Ani afuyagamomo'ya amaku'afi hulategeta vamano.” hu'ya havigae. <sup>13</sup> Havigageno Yisasi'a “Ani'a hiho.” huno hige'ya Kefo Avamu'mo'ya ani kanomo agupitila hatilavi'ya afuyagamogami amakupi haifalageno ani afuyagamomo'ya

amaiyaye'ya nagola aulufi kapi tavite'ya tipi asaga hulavi'ya ti nakai'ya fali ha'no humainae. Afua tu tauseni'a (2,000) afuyaga fali ha'no humainae.

<sup>14</sup> Fali ha'no hage'ya ani afuyagale kava ne'yagaiya vayala fale'ya ala kumatega mainaya vea'nehe'ene hoyafinaga mainaya vea'nehe'ene “Na'a ma'a higeta ne'one.” hu'ya hamapaige'ya ani veala “Hia yana agesune.” nehu'ya emainae.

<sup>15</sup> Yisasite e'ya kasago'ya Kefo Avamu'mo'ma agupifiti hatilavino via kanomona agesa akalo higeno kena'a failino anile mopale mainege'ya megete'ya koli hae.

<sup>16</sup> Yisasi'ma humainea kava'ma agemainaya vea'mo'ya na'a ma'a huno Kefo Avamula agupima mainea kanoa alino kanale hutea yafe'ene afuyagama humatea yafe'ene hamapaiye.

<sup>17</sup> Hamapaige'ya ani vea'mo'ya Yisasifena “Tagaila tataleka ago vuo.” hu'ya hae.

<sup>18-19</sup> Hageno Yisasi'a ugahe tipi kalefi haisaga hunemaigeno Kefo Avamu'ma agupiti ataleno umainea kanomo'a Yisasifena “Kagai'ene visu'e.” huno havigegenno Yisasi'a “A'ao kagaya nokalega visana'amoga muki'a Anumayamo'ma aigekateno hugatea yafena vayakamogamina mo hamapaiyo.” huno hie. <sup>20</sup> Higeno ani kanomo'a via'yamo teni'a (10) ala kuma'yaga hanea kotega uno Yisasi'ma hutea yafena hamapaige'ya muki'a vea'mo'ya amama'yoa aimainae.

*Soka kanomo munala faligahe humaine.*

21 Yisasi'a tipi kalefi asaga humaino tina lakaeno eteno ti agegayalega ege'ya muki vea'mo'ya agaite melitalu humainae. 22 Emainageno nagola soka kanoa, Yailasi'e nehaya kanoa, emaineno Yisasina mogeteno aiyafi mope humaine. 23 Mope humaineno tokiya'age huno Yisasina mage huno havige “Vae nagai munala faligahe ayaya ne'aigi kaya mo maletesanageno kanale hutesie.” huno hie. 24 Higeno Yisasi'a agai'ene vige'ya veala yage'yage hu'ya akave umainae.

*Yisasina kena'ale avate hia a'mona kali'amo'a ha'no humaine.*

25 Vageno tuelufu'a (12) kafua muki'a kanale aigu nopinaga nemaiya aala anile maine. 26 Nago'a tota vayate ute ete hugeteana agataiya kavala hageno mone'lama amaminea yamo'a ha'no higeno ani kali'a nago kanomo'a ali kanale huo'atenegi kali'amo'a ala humaine. 27 Ani a'mo'a Yisasi avagea haviteno ani yage'yage'ma haya veapi Yisasina akavelegati kena'ale mevate hie. 28 Avate nehuno agesa mage huno havie “Kena'ale avate nehisugeno kali'nimo'a ha'no hunategahie.” huno agesafinaga havimaine. 29 Haviteno ani'a higeno aupu'a kolamo'a ta'negeno augafafinaga malegeno ageana kali'amo'a ago kanale hutene. 30 Kanale huteanagi Yisasi'a “Nago'a tokiya'nia ago nataleno vie.” huno agesafinaga haviteno anifima alitalu humainaya vea'mogami amu'nopi maiyahae



huno mage hie “Ta kena'nilela mevate hie?” huno humaine. <sup>31</sup> Hige'ya agai'aenema tokae'ya nemaiya anaga'amo'ya mage hae “Muki'a veala yage'yage hageka ne'aganagi na'a higeke na kea hamavinegane?” hu'ya hae. <sup>32</sup> Hageno Yisasi'a moge mege huno avate hia kanohe ati ayemaine. <sup>33</sup> Ati ne'ayegeni ani a'mo'a kali'a ago kanale hutegeni agea yafe koli huno atili huteno aiyafi mope huno Yisasi'ma hutea yafena tamage huno hapaiye. <sup>34</sup> Hapaigeni Yisasi'a mage huno hie “A'mogae nagai'fema havika kagupi maleka kametiti hanageni ago kalika'amo'a kanale hugategi kaipamo'a yasi nehinageka afa'a vuo. Kalika'a agola ha'no hie.” huno hapaiye.

<sup>35</sup> Hanepaige'ya nago'a vayala soka kanoa, Yailasi notegati mage hu'ya me hapaiye “Munakamo'a ago falimainegi ataleka kava kanomona kasalo haegi nago'ene havioko.” hu'ya hae. <sup>36</sup> Hageno Yisasi'a hapaiya kehena ohavisia aghesa haviteno soka kanohena mage huno hie “Kolia ohuka nagai'fe havika kagupi maleka kametiti huo.” huno humaine. <sup>37</sup> Muki'a veafena omeho hune'amateno Pita'ene Yemesi'ene nepu'amo'a Yoni'ene amavaleno umainae. <sup>38-39</sup> Soka kanomo note uva'yi hu'ya agayana muki'a veala tusi'a avine'atageno Yisasi'a nopi haifaleno amakaifena mage huno hie “Na'a higetama tusi'a aviane'atae? Ma munala ofalinegi afa'a faeno maine.” huno hie. <sup>40</sup> Mani kea hige'ya vea'mo'ya falige'yama agaya yafe kigi'a hutageno “Kumataga hatilavitama

viho.” huno hige'ya kumatega hatilavigeno Yisasi'a ita'afo'amoganiene agai'aenema vaya anaga'ene amavaleno falimainea muna'ma malalega amavaleno haimaine. <sup>41</sup> Haino umaineno ayate atafa hulineno agai'a kefiti mage huno hie “Talita kumi.” huno hie. Tagaiti kefina “Ma muna'moga kahanepaugi hetio.” huno humaine. <sup>42</sup> Higeno aupa'a ani muna'mo'a hetino ute ete hie. Ago ala munalagino tuelufu'a (12) kafu'a hanea munalagino hetino ute ete hige'ya anile mainaya vea'mo'ya amama'yo aiye. <sup>43</sup> Amama'yo aigeno Yisasi'a tokiya'age ke huno “Anima agaya yafena veala hama'opaiho” huno kahegi ne'amateno “Kavela amiho.” huno humaine.

## 6

*Nasaleti kumate vea'mo'ya Yisasina amakave'no hutena.*

<sup>1</sup> Yisasi'a ani kumala ataleno via'amo ko aepa'alega vige'ya agai'aenema tokae'ya nemaiya anaga'mo'ya akave umainae. <sup>2</sup> Sapati yupa mono no'amifi haino Anumaya Koti kea muki'a vayala hamapaige'ya havite'ya amama'yo aige'ya mage hu'ya hae “Muki'a havi havi'yana hanateti alia kea nehie? Ayapitila tokiya'age avame yama humainea tokiya'a hanateti alimaine? <sup>3</sup> Mani kanoa no negia ali'yate kano maineanagi Malia nafa'ne mainegi Yemesi'ene Yosese'ene Yutasi'ene Saimoni'enena agana'amo'ya

mainagi asa'amo'ya tagai'ene nagopi mainae.” hu'ya hute'ya amaipa kafa hete'ya amakave'no hutenaē. <sup>4</sup> Amakave'no hutayanagi Yisasi'a mage huno hie “Anumaya Koti kema nehia kanomo'a muki'a kumate mono huhaleno hamapaisiana agia alisaga nehagi kuma'ale maisiana agai'a afamo'ene no kuma'ale vaya'enena agia alisaga ohugahae.” huno humaine. <sup>5</sup> Mani kumatela ala tokiya avame yana ohunegi afa'a nagoke nagoke kali vayake aya malegeno kanale humatene. <sup>6</sup> Kanale humatenegi afa'a muki'a veala agaife havi'ya amakupi male'ya amametiti ohaya yafe Yisasi'a ama'yo aigeno alu kumate kumatela vaiyeno monola hamapaino humaveli maine.

*Yisasi'a tuelufu'a (12) anaga'amogamina ali'yate humatene.*

<sup>7</sup> Yisasi'a tuelufu'a (12) anaga'amogamife ke hige'ya ageno muki'a Kefo Avamu'ma vea'mogami amakupiti amanatitalessaya tokiya amamiteno mage hie “Tole ali lokaete lokaete hutama viho.” huno humatene. <sup>8</sup> Hune'amatenno mage huno hie “Kama visayana ayopatamige alilitama viho. Kutamiene mayaene monetamiene alitama o'viho. <sup>9</sup> Tamaiya nona vaigahayanaki tole siota vaio'aliho.” <sup>10</sup> Nago'ene mage huno hie “Nago nopima haifalenuamahena ani nopi faetama maitama hutetama amataletama alu kumatela viho. Faelitetama ohiho. <sup>11</sup> Nago'a kumate'ma visage'ya vea'mo'ya ali falu falama huotamate'ya ‘Tamakai kema ohavigahune.’

hu'ya hisagetama ani kumala ne'ataletama 'Havi kava hae.' hutama hisaya yafe tamaiyafima hanesia kugukege mopa aihehe hune'ataletama viho." huno hamapaiye. <sup>12</sup> Hamapaige'ya ani vayala ne'u'ya muki'a vea'nehe mage hu'ya hae "Kefo yatamihena havitama tamakaye nehinagetama tamaku'a aiyahae hiho." hu'ya hamapaiye. <sup>13</sup> Hamapai'ya muki'a Kefo Avamula vea'mogami amakupitila amanati ne'atale'ya kasago'ya kali veala amaugafale masavena falematageno kanale humatene.

*Heloti'a agesa haviana Yisasifena "Ti falemate Yoni'e." huno humaine.*

<sup>14</sup> Ani kanafina Yisasi avagemo'a ala higeno nagola sauve kanomo agia Heloti'e anima haya kea havimaine. Nago'a vea'mo'ya Yisasifena mage hu'ya hae "Ma kanoa tima falematea Yoni'e falimainefiti hetimaine. Hetimaineafe tokiya'a hanegenoma tokiya ali'yana ne'alie." hu'ya hae. <sup>15</sup> Hage'ya nago'a vea'mo'ya Yisasifena mage hu'ya hae "Ma kanoa Ilaiya maine." hu'ya hage'ya nago'a vea'mo'ya "Aune kanoa nayo amaune vaya kana nehie." hu'ya hae. <sup>16</sup> Hageno Heloti'a haviteno mage huno hie "Yonina haeho hu'na huge'ya age'ya hataga hutalenaya kanoa faliteno komufiti hetimaine." huno hie.

<sup>17-18</sup> Helotina agana'amo agia Filipi'e. Filipi a'mo agia Helotiasi'e. Heloti'a Helotiasina kumai a alitenea yafe Yoni'a Helotife mage huno hie "Anumaya Koti kea atagaeka kaganakamo aala

kumai a alitenane.” huno hia yafe Heloti'a vay-ala humatege'ya Yonina motafa hu'ya avale'ya kina nopi hutenayane. <sup>19-20</sup> Hutenageno Helotiasi'a Yonifena tusi hai vaiteteno haesageno falisia agesa havino maiyanagi Heloti'a agesa mage huno havimaine “Yoni'a kefo yana ohuno fatago kanoa alu aotage kano maine.” huno havilinea yafe Yonifena koli huno “Ohaegahae.” huno au'ne'vaino agai kea haviteno agesa ku'mo nehuno tole agesa havino afa'a muse huno ke'a nehaviane.

<sup>21</sup> Nago yupa Helotina atenea kanamo'a falote higeno Heloti'a ala imu kimaleteno muki'a kamani kava vaya'ene ati kava vaya'ene Kalili kotegama afenoma'a kasago humainea vaya'yagaene ke hige'ya imulega emainae.

<sup>22</sup> Emainageno Helotiasina muna'amo'a eno amone'ayegeno Heloti'ene vaya'amo'yaene ne'age'ya tusi'a musema'a hageno Heloti'a ani muna'mofena mage huno hie “Kahaisia yafena afa'a hisanage'na kamigahue. <sup>23</sup> Anumaya Koti aulagafi kahanepauve nago'a yafema nahavigesanana afa'a kamigahue. Mone feno'enefema nehuka mopaenefema hisanana afa'a nagai ya'yaga haneanagi'na amu'nopiti ali fako hu'na kamigahue.” huno humaine.

<sup>24</sup> Higeno ani muna'mo'a via'amo ita'amofena mage huno havige “Na kanohe ke hu'na havigesue?” huno higeno ita'amo'a mage huno hie “Yoni'a ti falemate kanomo age'ya fakaliteka anuma'a aifakalika me namio huka

hapaiyo.” huno hie. <sup>25</sup> Higeno aiyayeno ala sauve kanomotega via'amo mage huno hapaiye “Aupa'a ti falemate Yonina age'ya fakaliteka anuma'a yopafi maleka me namio.” huno hie. <sup>26</sup> Higeno ala sauve kanomo'a haviteno aipamo'a tusi'a kana'age higeno Anumaya Koti aulagafima huno lokiya vaimalea yafe'ene maiya vayafe'ene aghesa haviteno mage huno hie “Ani muna'mo kea he fala'okigahue.” huno hie. <sup>27</sup> Higeno aupa kano'a nago ati kano'a huteno mage huno hapaiye “Yonina age'ya mo fakalika anuma'a alika eno.” huno higeno kina nopi via'amo Yoni age'ya mo fakalitalene. <sup>28</sup> Fakaliteni anuma'a yopafi maleno alino ea'amo ani muna'mona memigeno ita'amona alino amine.

<sup>29</sup> Amige'ya Yoni'enema tokae'ya nemaiya anaga'mo'ya ani kea havite'ya u'ya augafa'a moli'ya yafakapi mo hevaitenae.

*Yisasi'a faefu tauseni'a (5,000) vayamogami kavela amamine.*

<sup>30</sup> Aposolo vayala Yisasitega ete'ya muki'a humainaya kava'ene humaveliya kene e'ya me hapaimainae. <sup>31</sup> Me hanepaige'ya muki'a vea'mo'ya agaitega ne'u'ya ne'e'ya mai'ya hageno Yisasi'enema tokae'ya nemaiya anaga'mo'ya kave'amima nesaya kana'amia omalea yafe Yisasi'a mage huno hie “Egeta tagaitige ka'me kotega umaifalu hamano.” huno hie. <sup>32</sup> Hige'ya amakai'amige tipi kalefi haisaga humai'ya ka'me kotega ugahe umainae.

33 Vage'ya muki'a vea'mo'ya amakete'ya amaugosafina ago agetainaya vayalegi'ya kuma'amileti mopafi amaiya ye'ya uhagote'ya ani ka'me kotega uva'yi humainae. 34 Uva'yi hageno Yisasi'a tipi kalefiti asaga hulavino ageana muki'a vea'nea elitalu humaiya veala amaketenno ageta mage huno havie “Ma vea'nea sipi sipi kana hu'ya mainayanagi kava yagaisaya vayala omainae.” huno agetama havia yafe kalagi aimatenno alu ke alu kea hamapaiye. 35-36 Hamanepaigeno yagemo'a tavi falegahe hige'ya agai'aenema tokae'ya nemaiya anaga'mo'ya agaite e'ya mage hu'ya hae “Ma kumala vava omai kuma hanegenno yagemo'a tavi falegahe nehiafe ma veala humatesanage'ya u'ya nago'a vea'mogami hoyafiti'ene notegati'ene nesaya kave'amia mo miya hisae.” hu'ya hae. 37 Hageno Yisasi'a mage huno hamapaiye “Tamakaya tamakaitami nesaya kavela amamiho.” huno hige'ya agaifena mage hu'ya hae “Nago kanomo'a tu hataleti'a (200) kanafi ali'ya alitenno ani moneleti kosa hesia maya miya ohile'asine. Tagaya ani moneleti mo miya hulita ani maya memamisune hunageka nehano?” hu'ya hae. 38 Hageno Yisasi'a mage huno hie “Mogeho na'magi maya hane?” huno hige'ya u'ya mogayana hige'ya “Faefu'a (5) mayagi tole noyamegi huno hane.” hu'ya hae.

39 Hageno Yisasi'a mage hie “Muki'amogatama alitalu hute hute hutama kanale apepate mopale maiho.” huno hie. 40 Hige'ya fifiti'a

(50) veala nagopi alitalu hu'ya maige'ya vani hataleti'a (100) veala nagopi alitalu hu'ya mainae. <sup>41</sup> Yisasi'a faefu'a (5) mayaene tole noyamene aliteno anafinaga agesaga huno ne'ageno Anumaya Kotitega ani kavefe huno muse huteno maya kofa huno agai'aenema tokae'ya nemaiya anagala amamige'ya ali'ya fako hutele hu'ya veala ne'amamigeno tole noyamene kolino muki'a vea'ma nesayafe amamine. <sup>42</sup> Amamige'ya muki'amo'ya ne'ya amamu hae. <sup>43</sup> Amamu hige'ya atalaya mayaene noyamene atupatapa'a alitalu hu'ya kupi aite'ya tuelufu'a (12) kupi aigeno havatemaine. <sup>44</sup> Ani kave'ma nemainaya vayala faefu tauseni'a (5,000) vemo'ya nemainae.

*Yisasi'a ti agupile umaine.*

<sup>45</sup> Aupa'a Yisasi'a agai'aenema tokae'ya nemaiya anagafe mage huno hie “Tamakaya nagaila nenataletama hagotetama tipi kalefina haisaga humaitama atu kaiyaga Petesaita kumatega utege'na nagaya veala humatesuge'ya viho.” huno hie. <sup>46</sup> Viho humateg'e'ya utageno Yisasi'a Anumayamotega ke huno havigegahe ago'yafi haimaine. <sup>47</sup> Haino mainegenon hanikigeno tipi kalemo'a tikotumona amu'nopi utegenon Yisasi'a agai'age ti agegayale maine. <sup>48</sup> Maineno ageana amaulegati yasimo'a ea'amo tipi kalemona meyetu fegeteana o'vigeno Yisasi'a ageteno kotigahe hia avametega ti kotumona agupile via'amo amakaitela momakasegahe hie. <sup>49</sup> Amakasegahe ti agupile vianagi ene'lege'ya



agete'ya amakesa mage hu'ya haviye “Hakalo ne'efi?” nehu'ya “Avovo.” hae <sup>50</sup> Avovo hu'ya tusi'a koli hute'ya atali talu hayanagi aupa'a amakaifena mage huno hie “Kolia ohutama maiho. Nagaya ne'ogi tokiya vaitama maiho.” huno hie. <sup>51</sup> Huteno tipi kalefi haino amakai'ene nemaiyana yasimo'a taga hige'ya ani vaya'mo'ya tusi'a amama'yoge humainae. <sup>52</sup> Yisasi'a tokiya'aleti kave'ma amaminea yafena amaku'amo'a ha'yagino atalako hige'ya aepa'a havilama ohunae.

*Yisasi'a kasago'ya Kenesale veala kali'amia alino kanale humatene.*

<sup>53</sup> Ti kotuna takae'ya Kenesale kotega uva'yi hute'ya hatilavi'yama vayana tipi kalea nofiteti ayetenae. <sup>54</sup> Tipi kalefiti hatilavino ne'vige'ya aupa'a vea'mo'ya Yisasina augosafina agemainae. <sup>55</sup> Agete'ya note note amaiyaye'ya ute ete hu'ya kali veala hagifanale amavale'ya “Yisasi'a ma kumate maine.” hu'ya haya kea havite'ya agaite amavale'ya etele humainae. <sup>56</sup> Yisasi'a vilega osi kumatelo ala kumatelo talapinagao kali veala amavale'ya kuma amu'nopi momatene'ya Yisasifena mage hu'ya havigae “Kanale kenakamo atupalela avate hisuno?” hu'ya hate'ya avate humainaya veala kalimo'a kanale humatene.

## 7

*Anumaya Koti kahegi kemo'a tototimogami kemono agasemaine.*

<sup>1</sup> Nago'a Falasia vaya'ene kahegi kema havilinaya anaga'ene Yelusalemuti Yisasite emainae. <sup>2</sup> Emaine'ya agayana nago'a Yisasi'ene tokae'ya nemaiya anaga'mo'ya amayana sese ohu'ya kavela nenage'ya amakemainae\*. <sup>3</sup> Falasia vaya'agela omainagi muki'a Yuta vea'mo'yaene amakinagomo'ya humainaya kava akave male'ya amayama sese'ma ohayana kavela onenagi sese hute'lyage nенаe. <sup>4</sup> Situatega uge'yama enu'ya tima ofalesayana onegahagi tina falete'lyage amaugafamo'a hilato hutege'ya kavela nенаe. Ani yama'agelomagi nayona vaya'mo'ya kahegi kea tokiya'age hu'ya humainaya kehe havi'ya masuene yopaene susufanene muki'a sese nehаe. <sup>5</sup> Falasia vaya'ene kahegi kema havilinaya anaga'ene Yisasife mage hu'ya me hae "Na'a hige'ya kagai'enema tokae'ya nemaiya anaga'mo'ya taginagomogami kavala ne'atale'ya ani kea atagae'ya kave'ma negahena amayana sese nohae?" hu'ya havigae. <sup>6</sup> Hageno Yisasi'a kenona'amia mage hie "Tamakaya vagala vaya mainae. Aisaiya'a Anumaya Koti aune kanomo'a tamakaifena tamage huno Anumaya Koti auta'mafina mage huno humaineane

'Ani nofi vea'mo'ya amavayaleti hu'ya nagai nagia alisaga nehayanagi amaku'amo'a alulega hanege'ya ani'a kavala nehаe. <sup>7</sup> Amakaya ma mopafi vea'mogami amavayafiti humainaya kahegi kehe mage humainayane 'Mani kea Anumaya

Koti ke hanegi akave maleho.' hu'ya humainayanagi nagai nagia alisaga hisaya kavala ohu'ya afa kava mai'ya nehae.' huno kaemaleneane.

<sup>8</sup> Anumaya Koti kahegi kea ataletama vea'mo'ya malenaya kea akave nemalae.

<sup>9</sup> Huteno nago'ene mage huno hie "Tamakaitami tamakinagomogami kava'ma akave nemalaya yafe Anumaya Koti kahegi kea ago atalena. <sup>10</sup> Mosese'a mage huno humaineane

'Tamakaya itatami afotamimogami amakia alisaga nehutama ke'amia veganokanola ohutama amaiya'afinaga maiho. Nago'a vea'mo'ya ita'af'o'amimogamima kamugema vaimatesayana faligahae.' huno humaineane.

<sup>11-12</sup> Humaineanagi tamakaya mage hutama hae 'Nago kanomo'a ita'af'o'amogani anaya hisia monema hanesigeno'a ita'af'o'amoganina anayama ohinuno'a mage huno hisie 'Ani monea Anumaya Kotina amisua yane hu'na humainoe.' huno hinunofena ita'af'o'amoganina nago'ene anayama ohisiana kanalele.' hutama nehae.

<sup>13</sup> Ani kema haya yafe tamakinagomogami kavala akave malenayafe Anumaya Koti kehena 'Afa yane.' hutama muki'a ani kavala nehae." huno humaine.

*Vea'mogami amaku'afima oni'ya'age nehamaiya yane.*

<sup>14</sup> Yisasi'a kasago'ya veala agaite esaya yafe nago'ene ke hige'ya ageno mage huno hie

“Tamakaya mani kea havilama hutama hav-  
iho. <sup>15-16</sup> Nago'a nesaya yamo'ma tamavayafi  
visia yamo'a tamaku'afina oni'ya otamahau-  
gahigi tamaku'afiti'ma hatilavisia yamo ali falote  
hisigeno tamaku'amo'a oni'ya'agela hugahie.”  
huno hie.

<sup>17</sup> Huteno ne'amataleno nopinaga haino  
mainege'ya agai'aenema tokae'ya nemaiya  
anaga'mo'ya Yisasife mage hu'ya hae “Kagaya  
mani avame kemona aepa'a hugeta havimano.”  
hu'ya havigae. <sup>18</sup> Havigageno Yisasi'a  
mage huno hie “Tamakai'enena havilama  
ohutama nehao? Tamakaya ohavinao muki'a  
yana tamavayafima nesaya yamo'a oni'ya  
otamahaugahie. <sup>19</sup> Tamavayafi naya'amo'a  
tamaku'afina o'uno afa'a tamaipafike taviteno  
haenaga'a aifayolagafina taviteno afa ya  
kana nehie.” huno hie. Mani kema hiana  
muki'a kavela afa'a nesaya kaveke'ya hane  
huno hie. <sup>20</sup> Huteno mage huno hie “Nago'a  
yama tamavayafiti'ma hatilavisia kemo'a  
tamaku'amona alino oni'ya'age nelamahaiye.  
<sup>21-22</sup> Vea'mogati tagu'afiti'ma efalote hia yamo'a  
ma'a huno ali falote nehie kanale ohunea tagu  
tagesa nehavuna ya'ene a'ne muna'nene kumai  
he ya'ene musufaya hu ya'ene vaya hamaefali  
ya'ene alu kanomo a'ne amavayu hu ya'ene  
alu kanomo yafe age ha'ye hu ya'ene kefo  
ya'ene havige huno savale savala hu ya'ene  
age lamaha'ye nehaya ya'ene veamogami  
taipa havita haviya hune'amatona ya'ene

veafe havige humate ya'ene taugafa alita hai ya'ene kema ohavi ya'ene tagu'afitila ali falote nehie. <sup>23</sup> Muki'a ani kefo yama nehaya yana tamaku'afiti efalote hia yamo tamaku'afina oni'ya'agela humaine.” huno hie.

*Fonisia kotega a'mo'a Yisasina agu'a amitafa humaine.*

<sup>24</sup> Yisasi'a ani kumala ne'ataleno Taiya kuma'mo kaiyaga umaineno agai'ama anile'ma emainea yafena vea'mo'ya ohavisae huno nago nopi haino maiyanagi afa'a agai'a fala'okigahie. Vea'mo'ya ago haviye. <sup>25</sup> Aupa'a nago a'mo'a Yisasi avagea haviteno eno aiyafi ale'ya meyemaine. Ani a'mo muna'mona agupi Kefo Avamula mainea alagino. <sup>26</sup> Isaleli vea omainea alagino Kaliki ke nehuno Fonisia nofi ale. Silia kotega alagino muna'amona agupi mainea Kefo Avamu\* anatitalesie huno auka'ya huno havige. <sup>27</sup> Yisasi'a mage huno hie “Nafa'nemo'ya hagote'ya kavela negahae. Havigu nafa'nemogami kavela hamanafaleta kalayagamogami amamisunana haviya hugahie.” huno hie.

<sup>28</sup> Higeno ani a'mo'a mage huno hie “Anu-mayamogae tamage hananagi nafa'nemo'ya ne-nageno osi atupa'a sipaleti asaga hulavia yana kalamo'ya yogi'ya nena. Kagaya ani kava huka nagaya Isaleli a omainoanagi osi'a naha'mao.” huno hie.

<sup>29</sup> Higeno Yisasi'a ani afena mage huno hapaiye “Keka'a ago hanage'na havuafe nokalega

vuo. Kefo Avamu'mo'a munakamona ago ataleno vie.” huno humaine. <sup>30</sup> Higeno noma'alega via'amo mogeana Kefo Avamu'mo'a ago ataleno vigeno muna'amo'a kanale huno sipale faemai-negeno ita'amo'a mogemaine.

*Yisasi'a nago aifo kanomo agesaene avayaene alino kanale hutene.*

<sup>31</sup> Yisasi'a Taiya kumala ataleno aiyahae huno Saitoni kumala agaseno via'amo teni'a (10) kuma hanelega mogaseno Kalili ti agegayalega uva'yi humaine. <sup>32</sup> Uva'yi hige'ya vea'mo'ya nagola yuna aifo kanoa Yisasitega avale'ya vayana ani aifo kanomo'a hagifali ke nehatagege'ya Yisaside mage hu'ya hae “Augafale kayateti avate hisane.” hu'ya havigae. <sup>33</sup> Yisasi'a ani kanoa ne'avaleno veala amataleno faitega anakai'anige umaine'ana aya avoyaleti aifo kanomona agesafi vaiteno avetu'na heno ayateti avefu'nale avatemalene. <sup>34</sup> Malegeno anafinaga agesaga huno “Vaeha auso'nio.” huteno agaifena agai'a kefiti mage huno hie “Efata.” huno hie. Tagai kefina “Kagesa akalo hino.” huno hapaiye. <sup>35</sup> Higeno agesamo'a akalo higeno avefu'namo'a kanale higeno aikalo huno kea kea hie. <sup>36</sup> Yisasi'a mage huno hie “Nago'a veala mani yafena hama'opaiho.” huno kahegi mateanagi ani kea hu'ya atile male hu'ya muki'a vea'mogami amakesale mohu mehu humainae. <sup>37</sup> Hage'ya haviya vea'mo'ya tusi'a amama'yo aige'ya mage hae “Muki'a yana aligeno kanale kanale nehie. Yuna aifo vayala aya malege'ya kea nehaviye.

Aifo vayala ke'amia ali falote hune'amamie.”  
hu'ya nehae.

## 8

*Yisasi'a fo tauseni'a (4,000) vaya kavela amamine.*

<sup>1-2</sup> Nago yupa kasago'ya vea'mo'ya alitalu hu'ya maiyana nesaya yana omalegeno Yisasi'a agai'aenema tokae'ya nemaiya anagafe ke hige'ya ageno mage hie “Mani veala tagufa (3) yupa nagai'ene mainageno nesaya kave'amia omalea yafe nahau hune'amatoe. <sup>3</sup> Nago'a veala aya'aya kotegati emainagi havigu amatalesuge'ya katega ne'visageno amakatesige'ya amaugetunatu hu'ya takatiyafena nonahaiye.” huno hamapaiye. <sup>4</sup> Yisasi'enema tokae'ya nemaiya anaga'mo'ya mage hu'ya hapaiye “Mauna kola vaya omai kolagi hanateti maya alita ani vea'nea amamisune?” hu'ya havigae. <sup>5</sup> Hageno Yisasi'a mage huno hamavige “Tamakaya na'magi'a maya hane?” huno hige'ya mage hae “Tagaipina seveni'a (7) maya'age hane.” hu'ya hapaiye.

<sup>6</sup> Hageno Yisasi'a muki veafena “Mopale maiho.” huno hige'ya mopale mainageno Yisasi'a ani seveni'a (7) maya alino Anumayamotega muse huno havigeteno aposite aposite huteno agai'aenema tokae'ya nemaiya anagala amamige'ya muki'a veapina vaya kaiminae. <sup>7</sup> Nagoke okasi noyame kano'a hanegeni Yisasi'a Anumayamotega ani

noyamehe muse huteno “Amamite amamite hiho.” huno hige'ya vaya kaimainae. <sup>8</sup> Kaige'ya muki'a vea'nea nageno amamu hige'ya atalaya maya atupayaga Yisasi'enema tokae'ya nemaiya anaga'mo'ya alitalu hute'ya seveni'a (7) kupi aihavatemainae. <sup>9</sup> Ani kave'ma naya vene'nea fo tauseni'a (4,000) vaya'mo'ya nemainae. Netageno Yisasi'a humatege'ya umainae. <sup>10</sup> Utageno Yisasi'a agai'aenema tokae'ya nemaiya anaga'ene tipi kalefi haisaga humai'ya Talamanuta kumatega umainae.

*“Tokiya'age avame yana hugeta agamano.” hu'ya hae.*

<sup>11</sup> Falasia vaya'mo'ya Yisasite e'ya agai'ene ke vai'ya ayevataga hisaya yafe mage hu'ya hae “Kagaya ikapinagati tokiya'age avame yana hugeta agamano.” hu'ya hae. <sup>12</sup> Hageno Yisasi'a aipa havino kana'age huteno mage huno hie “Na'a higetama meni kanafima mainaya vea'mogatama tokiya'age avame yafena nahavingae? Tamage tamahapaisua kea haviho meni kanafima mainaya vea'mogatamina tokiya'age avame yana tamaveotigahue.” huno hie. <sup>13</sup> Huteno ne'amataleno tipi kalefi haisaga humaino atu faliga ugahe umaine.

*Falasia vaya'ene Heloti'ene nehaya kea kaihama halenegia yate huvame ke humaine.*

<sup>14</sup> Yisasi'enema tokae'ya nemaiya anaga'mo'ya tima lakae'ya vayana amakekani'ya nagoke maya kano'a ali'ya



umainae. <sup>15</sup> Ali'ya vayanagino Yisasi'a mage huno hamapaiye “Tamakaya Falasia vaya'ene Heloti'ene amakupima hanea yana agelama ohune'ya amavayaleti havigema nehaya yamo'a kaihamemo halenegia avamete huno halegino alakefa hisia yafena ka'ye ho.” huno hie. <sup>16</sup> Hige'ya ani vaya'mo'ya amakai'amia huge havige nehu'ya mage hae “Tagaya maya o'alita emainona yafe nehie.” hu'ya amakai'amia hae. <sup>17</sup> Hageno Yisasi'a ani vaya'mo'ya haya kea ago haviteno mage hie “Na'a higetama ‘Kavetia alita omenone.’ hutama tamakaitamia huge havige nehae. Tamakesa havilama hutama ohavinao? Tamaku'amo'a tilemainegetama nohavio? <sup>18-19</sup> Tamaulaga haneanagi agelama nohao? Tamakesa haneanagi havilama nohao? Faefu'a (5) maya ali'na aposite'na faefu tauseni'a (5,000) veyagama amaminoa yafena tamakekanitama mainao? Na'magi kupi atupatapa aimalageno havatemaine?” huno hamavigege'ya “Tuelufu'a (12) kule.” hu'ya hapaiye. <sup>20</sup> Hageno mage huno hie “Seveni'a (7) maya ali'na aposite'na fo tauseni'a (4,000) vaya amamuge'ya nete'ya na'magi kupi atupatapa aigeno havatemaine?” huno hamavigege'ya “Seveni'a (7) kule” hu'ya hapaiye.” <sup>21</sup> Hageno mage huno hie “Na'a higetama nohaviye?” huno hamavige.

*Yisasi'a nagola aulaga asu humai kanoa Petesaita kumate alino kanale hutene.*

<sup>22</sup> Petesaita kumate uva'yi hage'ya vea'mo'ya nagola aulaga asu humainea kanoa avale'ya Yisa-

site ne'e'ya mage hu'ya hae “Museka'a nehunagi augafale avate huo.” hu'ya hae. <sup>23</sup> Hageno Yisasi'a aulagama asu humai kanoa ayate alino kumala ataleno avaleno malaga via'amo aulagafi avetu'na heteno aya nemaleno mage huno havige “Nago yana ne'lagano?” huno havige. <sup>24</sup> Higeno agesaga huno ageana higeno mage huno hie “Veala ne'lagoge'ya yosa kana hu'ya vaiyatete nehae.” huno hie. <sup>25</sup> Higeno Yisasi'a nago'ene ani'a huno ayana aulagale malegeno aulagamo'a kanale higeno agemaine. Aulaga age haleno muki yana kanale'ya huno agemaine. <sup>26</sup> Agegeno Yisasi'a mage huno hie “Ma kumatela o'uka eteka nokalega vuo.” huno hie.

*Pita'a hufalote huno “Yisasi'a Anumaya Koti'a taugafa aligatigahema hutenea kanoa.” huno h-maine.*

<sup>27</sup> Yisasi'a agai'aenema tokae'ya nemaiya anaga'ene Sisalia Filipai kotega hanea kumate ugahe katega ne'uno mage huno hamavige “Vea'mo'ya nagaifena ta'e hu'ya nehae?” huno hamavige. <sup>28</sup> Hamavigege'ya kenona'a mage hu'ya hae “Nago'a vea'mo'ya kagaifena ‘Tima fale ne'amatea Yonile.’ hu'ya hage'ya nago'a vea'mo'ya ‘Ilaiya maine.’ hu'ya hage'ya nago'a vea'mo'ya ‘Anumaya Kotina aune kano'a maine.’ hu'ya nehae.” hu'ya hapaiye. <sup>29</sup> Hapaigeno Yisasi'a mage huno hamavige “Tamakaya nagaifena ta'e hutama nehae?” huno hamavigegeo Pita'a kenona'a mage huno hie “Kagaya Kalaisigae Anumaya Koti'a taugafa

aligatigane huno hugatenea kano mainane.” huno hie. <sup>30</sup> Higeno Yisasi'a amaumono maleno mage huno hie “Mani kea nago'a veala hamaopaiho.” huno humaine.

*Yisasi'a “Falite'na hetigahue.” huno humaine.*

<sup>31</sup> Ani yupa Yisasi'a agai'aenema tokae'ya nemaiya anagafena haenagama falote hisia yafe aepa heno hamapaino mage huno hie “Nagaya ikapinagati emainoa kanoa vaya'mo natenea kanomo'na tusiya hu'na nagata yana alisugeno Yuta vayatamaene mono note kava vaya'ene kahegi kema havilinaya anaga'ene amakave'no hunate'ya nahaesage'na falisuge'ya komufi hevainatesageno naugafamo'a tole yupa maitenage'na tagufa kanale falimainesufitila ete'na hetigahue.” huno hamapaiye. <sup>32</sup> Hufalote huno hamapaigeno Pita'a Yisasina faitega avaleno mage huno mo hapaiye “Kagaya ani kea ohuo.” huno hie. <sup>33</sup> Higeno Yisasi'a maiyahae huno nago'a agai'aenema tokae'ya nemaiya anagala amaketeno Pitafe keamakino mage huno hie “Sataniga mai halenato kagaya Anumaya Koti havimainea agu'agesa kanale'ya huka nohavinagi vaya'mo'ya kahapaiya amaku amakesa nehavine.” huno hie.

<sup>34</sup> Huteno kasago'ya alitalu haya vea'nene agai'aenema tokae'ya nemaiya anagafe'ene ke hige'ya ageno mage huno hamapaiye “Nago'a vea'mo'ya nakave visaya amakesa havinu'yahena amaugafama ali'ya hai yana amakave'no hutete'ya nagai'ma nagata

aisige<sup>1</sup>nama falisua avamete amakesa havite<sup>1</sup>ya yafaga yosa kofi<sup>1</sup>ya nakave visae. <sup>35</sup> Nago<sup>1</sup>a vea<sup>1</sup>mo<sup>1</sup>ya hamaimu<sup>1</sup>ma hanesige<sup>1</sup>ya mai ya<sup>1</sup>amima atafa hutalako hisageno<sup>1</sup>a ani yamo<sup>1</sup>a fanane hugahianagi nago<sup>1</sup>a vea<sup>1</sup>mo<sup>1</sup>ya nagai<sup>1</sup>fe hu<sup>1</sup>ya nagai kanale mono kema hamapaisaya yafema mai ya<sup>1</sup>amiene hamaimu<sup>1</sup>amiene atalesageno<sup>1</sup>a ani mai ya<sup>1</sup>ami aligatisige<sup>1</sup>ya agola maigahae. <sup>36</sup> Nago kanomo<sup>1</sup>a muki<sup>1</sup>a ma mopafi afeno yama alisia yafe faliteno agola maige maige hisia haimu<sup>1</sup>a atalesiana alimainea mone afeno yamo<sup>1</sup>a hana<sup>1</sup>a huno ha<sup>1</sup>maegahie? A<sup>1</sup>ao ha<sup>1</sup>omaegahie <sup>37</sup> Falitesigenofena agola maige maige hisia haimula eteno alisia yafe muki<sup>1</sup>a ma mopafi mone feno<sup>1</sup>yana afa<sup>1</sup>a atalegahianagi aya ohugahie. <sup>38</sup> Nago<sup>1</sup>a vea<sup>1</sup>mo<sup>1</sup>ya meni kanafina kefo yama nehaya vea<sup>1</sup>nene, Anumaya Koti kema atalete<sup>1</sup>ya alu kate ne<sup>1</sup>vaya vea<sup>1</sup>nene, maine<sup>1</sup>ya nagai kene nagai<sup>1</sup>nienefema hu<sup>1</sup>ya ‘Aote<sup>1</sup>yama<sup>1</sup>ae.’ hunatesage<sup>1</sup>na nagaya ikapinagati emainoa kanoa vaya<sup>1</sup>mo natenea kanomo<sup>1</sup>na esua yupa Nenafana tokiya hale yama<sup>1</sup>aene alu aotage ensole anaga<sup>1</sup>mo<sup>1</sup>yaene ete<sup>1</sup>na esuana ani<sup>1</sup>a hu<sup>1</sup>na ani vea<sup>1</sup>nehena nagaye hu<sup>1</sup>na ‘Tamahaote<sup>1</sup>yatamie.’ hu<sup>1</sup>na humategahue.” huno humaine.

## 9

<sup>1</sup> Yisasi<sup>1</sup>a mage huno hamapaiye “Tamage hu<sup>1</sup>na tamahanepauve male<sup>1</sup>ma heti<sup>1</sup>ya mainaya veala nago<sup>1</sup>amogatama ofalinesageno hagoteno

Anumaya Koti kava yagaisia yamo'a himamu yama'aene efalote hinagetama agetetama haenaga faligahae.” huno hamapaiye.

*Yisasina augafamo'a alino alu kava humaine.*

<sup>2</sup> Yisasi'a sikisi'a (6) kana maiteno Pitana Yemesina Yonigamina amavaleno aya'aya ago'yafi hai'ya amakai'amige maine'ya agayana Yisasi augafamo'a alino alu augafa kalimaine. <sup>3</sup> Kena'amo'a mopafima mainaya vea'mo'ya sese nehageno efe'age nehia avamete ohunegi tusiya huno efe'age huno alave alave humaine. <sup>4</sup> Tole kanolatana Mosesene Ilaya'ene eva'yi hu'ana Yisasi'ene kaiyeke neha'age'ya agemainae. <sup>5</sup> Pita'a Yisasi'ene mage huno hie “Hulavenelina kanomogae tagaya male maunana kanale nehie. Tagaya katega nona tagufa (3) kilamatesune kagaila nagolagi Mosesena nagolagi Ilayana nagolagi huta kilamatesune.” huno hie. <sup>6</sup> Tusiya hu'ya kolima haya yafe Pita'a 'Na'ane ke hisue?' huno agha havigeno mani kea humaine. <sup>7</sup> Ani kea hanepaigeno agola sia'mo'a eva'yi huno melino aiso humategeno ani siapinagati age aino mage huno hie “Mani nafa'nea nagai nafa'negi nagu'afifena nenahaiya nafa'negi agai kea haviho.” huno siapinagati humaine. <sup>8</sup> Hige'ya aup'a moge mege hu'ya agayana nago'a vayala omaigeno Yisasi'a agai'age maine'ya agemainae.

<sup>9</sup> Agete'ya ago'yafitila enelavi'ya Yisasi'a kahegi maleno mage huno hamapaiye “Manima agaya yafena nago'a vea'nea

hama'opaiho. Haenagama nagaya ikapinagati emainoa kanoa vaya'mo natenea kanomo'na falimainesufiti hetisua yupa hamapaigahae.” huno hie. <sup>10</sup> Hige'ya ani kemo akave male'ya hama'opainagi “Falimainesufitila ete'na hetigahue.” huno hia kemo aepa'ahe atiye'ya amakai'ami huge havige hae. <sup>11</sup> Mage hu'ya Yisasina havigae “Na'a hige'ya kahegi kema havilinaya anaga'mo'ya Ilaiya'a hagoteno etesigeno Anumaya Koti'a hutesigeno taugafa aligatisia kanoa egahie hu'ya humainae?” hu'ya havigae. <sup>12</sup> Hageno Yisasi'a mage huno hie “Tamage Ilaiya'a hagoteno eno muki'a yana melino talo tala hugahie. Ani'a hu'ya nagaifena Anumaya Koti auta'mafina kaemalenayane “Ikapinagati emainoa kanoa vaya'mo natenea kanomonina amakave'no hunate'ya ali haviya hunatesageno naugafa nagata aigahie.” hu'ya nagaifena humainayane. <sup>13</sup> Tamahanepauve Ilaiya'a ago ege'ya Anumaya Koti auta'mafina kaemalenaya avamete hu'ya amakai'amia hamaiya avamete agaila havi kavala hutena.” huno humaine.

*Yisasi'a nagola manani'ya ne'agea nafa'nea alino kanale hutene.*

<sup>14</sup> Nagola agai'aenema tokae'ya nemaiya anagatega eva'yi hu'ya agayana kasago'ya veala anile alitalu humainage'ya kahegi kema havilinaya anaga'mo'ya Yisasi'enema tokae'ya nemaiya anaga'ene mo huhaviya me huhaviya hu'ya kea vaiye. <sup>15</sup> Ne'vaigeno muki'a

vea'mo'ya Yisasina agete'ya tusi muse nehu'ya amaiyaye'ya moli falu fala hutena. <sup>16</sup> Yisasi'a mage huno hamavige “Na'afene hutama mo huhaviya me huhaviya nehae?” huno hamavige. <sup>17</sup> Higeno nagola anile maiya kanomo'a mage huno hie “Humavenelina kanomogae Kefo Avamu'mo'a nafa'ne'nimona agupi haimaineno nafa'ne'nimo avayale maihiya humainege'na kagaitega avale'na ne'oe. <sup>18</sup> Ne'ogi Kefo Avamu'mo'a atafa huteno atalegeno takatino faemainegeneno agalemo'a selu selu nehigeno ave kume neganeno augafamo'a apipupapu nehige'na kagai'enema tokae'ya nemaiya anagafe ‘Kefo Avamula anatitaleho.’ hu'na huana ya hugete'ya anatio'atalena.” huno hie.

<sup>19</sup> Higeno Yisasi'a mage huno hie “Ae meni kanafima mainaya vea'mogatama nagaifena havitama tamakupina omalenetama tamametitia nohaya vea'mogatama na'magi kanafi tamakai'enena mainesugetama havigahae? Ohaviya yafena kasalo nenahae. Na'magi kanafi tamakai'enena kanale'ya hu'na ako hu'na maisue? Nagaitega avaletama eho.” huno hie. <sup>20</sup> Hige'ya avale'ya ageno Kefo Avamu'mo'a Yisasina ageteno ani nafa'nemona alino kigepagige hia kava huteteno ali takatitalegeno ani nafa'nemo'a mopafi asaga hulavino kasegase nehigeno agalemo'a selu selu humaine.

<sup>21</sup> Higeno Yisasi'a nefafena mage huno havige “Na'magi kanafi ani'a haumaine?” huno hav-

igegenon nefa'a mage huno hie “Osi nafa'ne mainegenon ani'a haumaine. <sup>22</sup> Muki'a kanafina Kefo Avamu'mo'a ayelakatitalegenon atafi'ene tipi'ene haefalisia kava nehige'na kagaya kanale humainenuka kahau hulateka taha'mao.” huno hie. <sup>23</sup> Higeno Yisasi'a mage huno hie “Na'a higeka nagaifena kanale humainenuka naha'mao huka nehane? Nagaifema agupi maleno ametiti nehia kanomo'a muki'a yana alu ya alu yana afa'a hile'asinagi.” huno hie. <sup>24</sup> Higeno aupa'a ani nafa'nemona nefa'a mage huno hie “Nagaya kagaifena nagupi male'na nametiti nehuanagi nagupi male'na nametiti hua yanimo'a aupa nehigi alika aya'aya hunato.” huno hie. <sup>25</sup> Hanepaige'ya veala tusiya hu'ya amaiyaye'ya elitalu hagenon Yisasi'a ne'amakenon Kefo Avamufena kemakino mage huno hie “Kagaya Kefo Avamu'mogae agesama ailileka avaya alilu kimaanana Kefo Avamu'mogae hai kahapauve agupitila hatilavika vuo. Nago'a kanafina nago'ene agupina haiofalo.” huno hutene. <sup>26</sup> Higeno Kefo Avamu'mo'a ala kenake nehunon ani nafa'nemona tusiya huno alino kigepagige hia kava huteteno hatilavino ataleno vigenon ani nafa'nemo'a fali vava kana huno faemainege'ya kasago'ya vea'mo'ya “Ago falimaine.” hu'ya hae. <sup>27</sup> Nehagenon Yisasi'a ayate alino avalesaga hutegenon hetimaine.

<sup>28</sup> Haenaga Yisasi'ene nopinaga hainon mainege'ya agai'aenema tokae'ya nemaiya anaga'mo'ya amakai'amige maine'ya mage



hu'ya havigae “Tagaya ya hugetonana ani Kefo Avamula na'a higeta anatio'atalenone?” hu'ya hae. <sup>29</sup> Hageno Yisasi'a mage huno hamapaiye “Ma'a augafa Kefo Avamula alu yatetila o'اناتigahagi Anumaya Kotitega ke huta havigesaya yatetike anaticahae.” huno hamapaiye.

*Tole kanale Yisasi'a “Falite'na hetigahue.”  
huno humaine.*

<sup>30-31</sup> Ani kumala ne'atale'ya Kalili kotegama vayana “Vea'mo'ya visua kumafena ohavisae.” huno hige'ya ako hu'ya falaki'ya ne'vageno agai'aenema tokae'ya nemaiya anagala Yisasi'a mage huno humavenelie “Ikapinagati emainea kanoa vaya'mo atenea kanoa agaila atafa hu'ya avale'ya vaya amayapi atesage'ya haesageno faligahie. Faliteno hevaitesageno tole yupa komufi maiteno tagufa (3) kana falimainesifitila hetigahie.” huno hamapaiye. <sup>32</sup> Anima hamapaiya kea havilama ohaya yafe koli'a hu'ya haviokenae.

*Ta ala kanoa maine?*

<sup>33</sup> Kapaneamu eva'yi hute'ya Yisasi'a nopi haino maineno amakaife mage huno hamavige “Katega na'ane kea kea hume hume emainae?” huno hamavige. <sup>34</sup> Katega ne'e'ya ma ke hume emainae “Kagaya ala kano mainapi nagaya kagase'na ala kanoa mainoe?” hu'ya huge havige hume aya kehenagi'ya kea ohu'ya mainae. <sup>35</sup> Mainageno Yisasi'a mopale maineno “Ege'na tamahapaino.” huno hige'ya tuelufu'a (12)

anagala ageno mage huno hamapaiye “Nago kanomo'a 'Ala kanoma maisue.' hinunofena hae-nagalafa maineno muki'a veala kayo kayo'ma humatesiana ala kano maigahie.” huno hamapaiye. <sup>36-37</sup> Huteno nagola okasi nafa'nea avaleno amu'no'amifi hetiteneno avalesaga huno anukilineno mage huno hie “Nago'a vea'mo'ya nagaifema havi'ya ma'a augafa osi nafa'nema avale'ya falu fala hisayana nagai'ene navale'ya falu fala hunenatae. Nagai'ma navale'ya falu fala hisayana hunatenea Nenafa'ene avale'ya falu fala hune'atae.”

*Ve'a'mo'ya kamema huotatesayana tagai kanapa maigahae.*

<sup>38</sup> Yoni'a mage huno humaineane “Hulavenelina kanomoga tagaya agonana nago kanomo'a kagai kagile Kefo Avamula vea amakusafinagatila anatine'atalegeta ne'ageteta takave'ma nohia yafe 'Ani'a ohuo.' huta 'A'ao.' hutenone.” huno hapaiye. <sup>39</sup> Yisasi'a Yonife mage huno hapaiye. “Ani kanoa alitama 'A'ao.' huo'ateho. Nago'a vea'mo'ya nagai nagile tokiya'age ali'yama alisayana aupa'a nagaifena huhaviyana huonategahae. <sup>40</sup> Ve'a'mo'ya kamema huotatesayana tagai kanapa maigahae. <sup>41</sup> Tamage tamahanepauve nago'a vea'mo'ya tamakayama Kalaisi nafa'nema mainaya yafe yasi tima tamamisagetama nesayana anona'a kanale miya aligahae.”

*Kefo au'ava yamo'a Yisasife amakupi male'ya ametiti nehaya yamona ali haviya nehie.*

42 “Nagola osi nafa'ne'ni, nagaife havino agupi maleno ametiti nehisia nafa'nehema nago'a vea'mo'ya ‘Kefo yama huo.’ hu'ya havi kapima avaletesayana tusi'a havi kava nehayanagi'na tusi'a kana ya amamigahue. Ala yafagefaleti ani kanomo age'yafi male'ya nofi kitete'ya hage lipi haga'yu hutalesayana afa ya kana kana ya haneanagi nagaya tusi'a kana ya amamigahue. 43-44 Kayamo'a ‘Kefo yama huo.’ huno kavaleno havi kapima katesigekahena ani kayana aifakalitalo. Aifakalitalesanana kanale hugahie. Kaugafamo'a haviya humainesia kanoma maisanana ha'no ohisia kahaimula hanesia kano maigane. Havigu tole kaya hanenageka kefo ya hisana kagesa kaminegeka kefo yama humainana yafe kavaleno hani yapi agola tegelege nehia atafi haga'yu hugatalegahie. 45-46 Kaiyamo'a ‘Kefo yama huo.’ huno kavaleno havi kapima katesigekahena ani kaiya aifakalika atalo. Aifakalitalesanana kanale hugahie. Kaugafa haviya humai kano maisanana ha'no ohu kahaimula hanesia kano maigane. Havigu tole kaiyamo'a kefo ya hisana kagesa kaminegeka kefo ya humainana yafe kavaleno hani yapi agola tegelege nehia atafi haga'yu hugatalegahie. 47 Kaulagamo'ma agea yafema kefo yama hisana kagesa kaminegekahena ani kaulaga ali fa'yika atalo. Ali fa'yitalesanana kanale hugahie. Nagoke kaulaga hanesigeno Anumaya Koti'a kava yagaimainea kumatela umaigananagi havigu tole kaulagamo'a kefo ya hisana kagesa kaminegeka kefo ya humainana

yafe hani yapi tegelege nehia atafi kavaleno haga'yu hugatalegahie. <sup>48</sup> Anima ata legelege nehia kumapi vea'mo'ya ani atafi mainageno kani kafa'amimo'a ofalisigeno atamo'a asua ohugahie.

<sup>49</sup> Hagama kavete falea avamete huno veala muki'amogatamina ataleti falelamategahie. <sup>50</sup> Hagea kanale ya haneanagi haga'age'ma nehia yama'a ha'noma hisiana hana'a hutama haga'age'ma nehia yama'a ali falote hugahae? Hage kana yana tamaku'afi hanesigetama alava hutama nagoke tamaku tamakesale kigi yokalo hutama maiho.” huno humaine.

## 10

### *Yisasi'a ve alavema apase yafe humaine.*

<sup>1</sup> Yisasi'a ani kola ne'ataleno Yutia kotega via'amo Yotani timo'a ame kaiyaga uva'yi huno mainege'ya muki'a veala agaita melitalu hageno nehia kava huno nago'ene hamapaiye.

<sup>2</sup> Hamanepaige'ya nago'a Falasia vaya'mo'ya Yisasite e'ya ase ohisea kema hisiafene hu'ya nagola ayevataga hisaya kea mage hu'ya havigae “Nago kanomo'a a'lama atalesia agha hisigeno'a kahegi kemo'a ‘Afa'a atalegahie.’ huno humaine?” hu'ya havigae. <sup>3</sup> Hageno Yisasi'a kenona'amia mage huno hamavige “Mosese kahegi kemo'a ani yafena na'ane humaine?” huno hamavige. <sup>4</sup> Hige'ya mage hu'ya hae “Mosese'a nagola kahegi kefina mage huno tahapaimaine

‘Vemo<sup>1</sup>a a<sup>1</sup>amona avo kaeno ne<sup>1</sup>amino hute-  
sigeno ha<sup>1</sup>no huno ugahie.’ huno humaineane.”  
hu<sup>1</sup>ya hae. <sup>5</sup> Hayanagi Yisasi<sup>1</sup>a mage huno hama-  
paiye “Tamakaya ke ohavitama veganokano haya  
yafe Mosese<sup>1</sup>a a<sup>1</sup>ma atalesaya kea kaemaleneane.  
<sup>6-8</sup> Kaemaleneanagi Anumaya Koti avopina mage  
huno humaineane

‘Ehe yupa Anumaya Koti<sup>1</sup>a vene a<sup>1</sup>ene talo  
humaleneane. Vene a<sup>1</sup>ene talo humalenea  
yafe nago kanomo<sup>1</sup>ma ita<sup>1</sup>afo<sup>1</sup>amoganima  
anataleno a<sup>1</sup>amo<sup>1</sup>ene ailokaeno maisiana  
ani tolemogania nagoke anaugafa  
kaliga<sup>1</sup>e.’ huno humaineane.

Na<sup>1</sup>a humaineafe nago<sup>1</sup>ene tolelatana omaiga<sup>1</sup>agi  
nagoke anaugafa kali<sup>1</sup>ana maiga<sup>1</sup>e. <sup>9</sup> Anumaya  
Koti<sup>1</sup>a ago alino hagelafimaleneanagino nagola  
ma mopale kanomo<sup>1</sup>a ani alavelatana mai  
ya<sup>1</sup>ania alino apase o<sup>1</sup>anatesie.” huno hie.

<sup>10</sup> Mani kea huteno nopinaga haino maineno  
agai<sup>1</sup>aenema tokae<sup>1</sup>ya nemaiya anaga<sup>1</sup>mo<sup>1</sup>ya ani  
kehena havinegae. <sup>11</sup> Havigageno mage huno  
hie “Nago kanomo<sup>1</sup>a a<sup>1</sup>ama ataleno alu a<sup>1</sup>ma  
aliana ani kanomo<sup>1</sup>a kumai kava huno hagote  
a<sup>1</sup>amona ali haviya hune<sup>1</sup>ate. <sup>12</sup> Nagi nago  
a<sup>1</sup>mo<sup>1</sup>ma anau<sup>1</sup>amoma ataleno alu vele<sup>1</sup>ma viana  
ani a<sup>1</sup>mo<sup>1</sup>a kumai kava nehie.” huno hie.

*Yisasi<sup>1</sup>a “Nafa<sup>1</sup>neyaga amatalege<sup>1</sup>ya nagaitega  
eho.” huno humaine.*

<sup>13</sup> Ve<sup>1</sup>a<sup>1</sup>mo<sup>1</sup>ya nafa<sup>1</sup>ne<sup>1</sup>amia avale<sup>1</sup>ya Yisasite  
“Aya malese.” hu<sup>1</sup>ya ne<sup>1</sup>age<sup>1</sup>ya agai<sup>1</sup>aenema  
tokae<sup>1</sup>ya nemaiya anaga<sup>1</sup>mo<sup>1</sup>ya “Na<sup>1</sup>a ohiho.”  
hu<sup>1</sup>ya kemamakimainae. <sup>14</sup> Yisasi<sup>1</sup>a kema

amamakiya yana ageteno haivaimatenno mage huno hie “Nafa'neyaga amatalege'ya nagaitega eho. Ka heakio'amateho. Nafa'ne avamete maiya vea'mo'ya mage nehae ‘Tagaitige maunana tokiyatia omalegi Anumaya Koti kava yagailatesie.’” hu'ya hae. <sup>15</sup> Tamagelafa hu'na tamahanepauve nafa'ne avamete maisaya vea'mo'ya ‘Tagaitige maunana tokiyatia omaleafe Anumaya Koti'a kava yagailatesie.’ hu'ya ohisayana Anumaya Koti'a kava yagaimainea kumatela o'ugahae.” huno hie. <sup>16</sup> Huteno Yisasi'a ani nafa'neyaga amavaleno amanukilinenno “Anumaya Koti'a kanale manua tamamisie.” huno amaugafale ayana malene.

*Kasago'ya afenoma'a hanea kava kanomo'a Yisasi'ene kea kea humaine.*

<sup>17</sup> Yisasi'a katega ugahe nehigeno nago kanomo'a aiyayeno ea'amo aule ale'ya meyeno mage huno havige “Kagaya kanale ya huka humavenelina kanomogae hana'a hute'na agola maige maige hisua nahaimula alisue?” huno hie. <sup>18</sup> Higeno Yisasi'a mage huno hie “Na'a higeka nagaifena ‘Kanale kano mainane.’ huka nehane? Anumaya Koti'a agai'age kanale kanoa maine. <sup>19</sup> Kagaya Anumaya Koti kahegi kea havilinane ani kemo'a mage huno humaine ‘Vayala haegenno ofalino. Kumai he yana ohuo. Musufa yana ohuo. ‘Ma kanomo'a havi kava nehie.’ huka havigehena kena o'valo. Havigea ayevataga huka alu vea'mo yana o'aliio. Itakafokamo kea ‘Kahaote'yaka'ae.’ ohuo.” huno hie. <sup>20</sup> Higeno

ani kanomo'a mage huno hie "Hulavenelina kanomogae nagaya nafa'nema mainoa kanaleti aepa he'na muki'a ani kema hana kea akave nemaloane." huno hie. <sup>21</sup> Higeno Yisasi'a ani kanoa ageana agaifena hau ayamopafima haiya yafena ageteno mage huno hie "Nago'a yafena kosa he'okatene. Nago kava'ene huo. Muki'a malenana mone afeno'yaka'a alika fako huka mone'amima omalenesia vea'nema amamisanageno'a Anumaya Koti'a ikapinaga afeno'yana kamigahie. Afeno'yaka'a fako huka amamite amamite huteka nakave eno." huno hie. <sup>22</sup> Higeno ani kanomo'a ani kea havianagi mone afenoma'ama kasago humainea yafe o'atalesia agesa haviteno augosamo'a atili kaegenoa aipamo'a tusi kana'age higeno ataleno umaine. <sup>23</sup> Vigeno Yisasi'a agai'aenema tokae'ya nemaiya anagala moge mege huno ne'amakeno mage huno hie "Muki'a mone afeno'ya'amima hanesia vea'mo'ya kasageke humai'ya humai'ya Anumaya Kotife 'Kava yagailato.' hu'ya hugahae." huno hie. <sup>24</sup> Hige'ya agai'aenema tokae'ya nemaiya anaga'mo'ya ani keheha amama'yoa aiyanagi Yisasi'a nago'ene mage huno hie "Nafa'ne'nimogatama vea'mo'ya kasageke humai'ya humai'ya Anumaya Kotifena 'Kava yagailato.' hu'ya hugahae. <sup>25</sup> Nagola pulumaka kana afumo agia kemolumo'a neka'yamo kapima haifalesiana afa'a yo'yo huno haifalegahanagi muki'a mone afeno'yama'a hanesia kanomo'a Anumaya Kotifena 'Kava

yagainato.' huno kasageke huno haifalegahie.” huno humaine. <sup>26</sup> Haviya anaga'mo'ya tusi'a amama'yo aige'ya mage hu'ya hae “Na'ama humainesiana hana vea'mogami amaku amame Anumaya Koti'a aligatigahie?” hu'ya hae. <sup>27</sup> Hageno Yisasi'a amakeke huno amakemaineno mage huno hie “Vea'mogamina tokiya'amia omaleneanagi'ya ohugahayanagi Anumaya Koti'a muki'a kava hisia tokiya'a haneanagino afa'a aligatigahie.” huno hie.

<sup>28</sup> Higeno Pita'a mage huno hie “Havio tagaya muki'a yatia ataleteta kagai kakavela ne'one.” huno hie. <sup>29-30</sup> Higeno Yisasi'a mage huno hapaiye “Tamage hu'na tamahanepauve muki'a vea'mo'ya nagaifema hu'ya nagai kanale mono kema vea'mogamima mo hamapaigahena no'amiene nepu'amiene amasa'amiene ita'amiene ne'amafa'ene nafa'ne'-amiene mopa'amiene amatale'ya visageno'a Anumaya Koti'a mopale mainaya kanafima atalenesaya no'amiene nepu'amiene amasa'amiene ita'amiene nafa'ne'amiene mopa'amiene nago'ene nago'ene ohavunama'a ya alite'ya huhaviyama humatesaya ya'ene alite'yagi haenaga'a maige maige hisaya hamaimula amamigahie. <sup>31</sup> Meni kanafima hagote'ya mainaya veala ani kanafina haenagalafa maigahayanagi meni kanafima haenagalafa mainaya veala ani kanafina hagote'ya maigahae.” huno humaine.



*Yisasi'a tagufa kanale "Falimainesufitila hetigahue." huno humaine.*

<sup>32</sup> Yelusalemu haigahena katega ne'u'ya Yisasi'a hagoteno vige'ya agai'aenema tokae'ya nemaiya anaga'mo'ya amama'yo ai'ya ne'vage'ya amakave vava vea'mo'ya koli nehageno Yisasi'a eteno nago'ene tuelufu'a (12) anaga'amogamina amahaote amavaleno momateneno haenagama agaila hutesaya yafena hamanepaiye. <sup>33</sup> Mage huno hie "Haviho tagaya Yelusalemu haisunage'ya ikapinagati emainoa kanoa vava'mo natenea kanomonia natafa huteno mono note kava vava'mogami amayapi'ene kahegi kema havilinaya anaga'mogami amayapi'ene natesige'ya nagafena 'Afa'a falisie.' hu'ya Yuta vea omainaya vava'mogami amayapi navale'ya nategahae. <sup>34</sup> Natesage'ya nagaye hisifa ke hunate'ya amavetu'na henenate'ya hegi ka'yoteti haifu namite'ya nahaesage'na yafaga yosale faligahue. Falisuge'ya hevainatetesage'na tole yupa komufinaga maite'na tagufa (3) kanale falimainesufitila hetigahue." huno hie.

*Yemesigani Yonigania "Ala kava kanolata maisu'e." hu'ana humaina'e.*

<sup>35</sup> Sepeti nafa'nelatana Yemesi'ene Yoni'ene Yisasite e'ana mage hu'ana haviga'e "Hulavenelina kanomogae nago yafe kahavigesu'ageka ani yana hula'ato." hu'ana haviga'e. <sup>36</sup> Ha'ageno Yisasi'a mage huno hanavige "Na'a hulanatesue?" huno hie.

<sup>37</sup> Hige'ana mage hu'ana ha'e "Tokiya hale yaka'afima umaisanageta'a ta'agaya kavate mainesu'ageka 'Nago'moga tamaga nayatega maiyo.' huteka 'Nago'moga hauga nayatega maiyo.' huka hula'ato." hu'ana havigemaina'e.

<sup>38</sup> Haviga'anagi Yisasi'a mage huno hanapaiye "Nahaviga'a yafena ohavina'e. Falisua yana satu'age humainea ti kana humainea ti hanea ke'ayopitila negahugi tanakaya na'ale'asino ona'ale'asine? Nagaila falenatesaya yamo'a, nagatama aisia yatetila tanakaila ani yateti falelanatesagetanahena afa'a aliga'o?" huno hie.

<sup>39</sup> Hige'ana "E, tokiyati'a haneanagita'a ani'a hugahu'e." hu'ana ha'ageno Yisasi'a mage huno hie "Tamage satu'age humainea tina nega'anagi falenatesaya yamo'a nagatama aisia yateti falelanategahae. <sup>40</sup> Falelanategahayanagi ala vaya'ma mainalega tamaga nayategaene hauga nayategaenena siale maisaya yana nagai yana omalegi Anumaya Koti'a agai'a ani yana ago nago'a vayafe huno talo tala huno ali fatago humatene." huno hie.

<sup>41</sup> Hige'ya teni'a (10) anaga'mo'ya ani kea havite'ya Yemesigani Yoniganina amaipa havi'ya haviya hunatenae. <sup>42</sup> Yisasi'a "Nagaitega eho." huno hige'ya ageno mage huno hie "Ma mopafi ala kava vaya'mo'ya 'Tusi'a ala vaya main-one.' hu'ya Yuta vea omainaya veafe ke amamaki'ya ali'ya ke humate'ya kava vaya'mo nehaya avamete kava nehae. <sup>43</sup> Na'a nehayanagi

tamakaya ani'a kavala ohiho. Tamakaipima 'Nagi hanea kanoma maigahue.' huno hisia kanomo'a ali'ya kanotami maino. <sup>44</sup> 'Uhagote'na maigahue.' huno hisia kanomo'a miya o'ali ali'ya kanotami maino. <sup>45</sup> Nagaya ikapinagati emainoa kanoa vaya'mo natenea kanomo'na vea'mo'ya naya hu'ya ali kanale hunatesaya yafene hu'na omenogi nagaya amaya hu'na ali'ya kano'ami maisuafene hu'na emaine'na muki'a vea'mo'ya kefo yama nehaya yamo aigagimatenea yapiti alikalu hematesuafe miya atalesue hu'na faligahe emainoe.”

*Yisasi'a nagola aulaga asu humainea kanoa alino kanale hutene.*

<sup>46</sup> Yisasi'a agai'aenema tokae'ya nemaiya anaga'ene kasago'ya vea'nene Yeliko kumate uva'yi hute'ya ani kumala mogase'ya ugahe nehageno nagola aulaga asu humainea kanomo agia Patimeusi'a Timeusi nafa'negino ka agegayale mopale maineno monehe auka'ya huge huge huno maine. <sup>47</sup> “Nasaleti Yisasi'a ago ne'e” hu'ya haya kea haviteno ke huno mage huno hie “Yisasigae, Tevitina aginagomogae nagaila kahau hunato.” huno hie. <sup>48</sup> Hige'ya kasago'ya vea'mo'ya kemaki'ya “Ke ohuka maiyo.” hu'ya hayanagi nago'ene ke huno “Tevitina aginagomogae nagaila kahau hunato.” huno hie. <sup>49</sup> Higeno Yisasi'a anile mo hetimaineno mage huno hie “Hapaigeno eno.” huno hige'ya ani kanohe ke hu'ya mage hu'ya hae “Kagu'a ali lokiya vaika aupa'a hetio.

Kagaife ke nehie.” hu'ya hae. <sup>50</sup> Hageno aya'aya yasi kena'a asagi ne'ataleteno aupa'a hetino Yisasite vie. <sup>51</sup> Vigeno Yisasi'a mage huno hie “Na'a hugatesue?” huno higeno aulagama asu humai kanomo'a mage huno hie “Humavenelina kanomogae naulaga agesue hu'na nehue.” huno hie. <sup>52</sup> Higeno Yisasi'a mage huno hapaiye “Afa'a vuo nagaifema havika kagupi maleka kametitima hana yateti ago ali'na kanale hugatoe.” huno higeno aupa'a aulagamo'a kanale higeno Yisasi akave umaine.

## 11

*Yisasi'a Yelusalemu kumapina sauve kana huno uva'yi humaine.*

<sup>1-2</sup> Yelusalemua aupate hanege'ya tole osi kumatalana Petafasiene Petaniene hanea kumate umainae. Ani kumatalana Olivi yosa hanea ago'yamo agegayalega hane. Anile maine'ya Yisasi'a tole agai'aenema tokae'ana nemai'a kanolatana hunateno mage huno hanapaiye “Atu kumate utetana atupa note hosi kana afumo agia tokimo nafa'nea ayetenayanagitana agega'e. Ani tokimo nafa'nea vayala o'amavaleneana tokie. Kalu hetana avaletana male e'o. <sup>3</sup> Ne'e'age'ya nago'a vaya'mo'ya ‘Na'a higetana na'a kavala neha'e?’ hu'ya hisagetanahena mage hutana hi'o ‘Kava kanotimo'a nago ali'ya aligahe higeta'a ne'o'anagino ali'yama'a aliteno aupa'a eteno tamamigahie.’ hutana hamapai'o.” huno hie. <sup>4</sup> Hige'ana ani kanolatana u'ana

ani tokimo nafa'nea no fiate ayetageno ka agegayale hetino mainege'ana mogefalote hute'ana nofila alikalu hemaina'e. <sup>5</sup> Neha'age'ya nago'a anile hetimainaya vaya'mo'ya mage hu'ya hae “Na'a higetana tokimo nafa'nea kalu neha'e?” hu'ya hae. <sup>6</sup> Hage'ana Yisasi'ma “Nage hutana hi'o.” huno'ma hia kea hamapai'age'ya ani vaya'mo'ya “Afa'a tokia avaletana vi'o.” hu'ya hae. <sup>7</sup> Hage'ana ani tokimo nafa'nea Yisasite avale'ana eva'yi hute'ana kena'ania anaugafaleti hate'ana ani afumo agupile yakaimala'ageno Yisasi'a anile haino maine. <sup>8</sup> Maige'ya muki'a veapiti nago'amo'ya amaugafaleti kena'amia hate'ya via katela yakaige'ya nago'amo'ya haisa hanete hanete yosayaga kofanafa hu'ya katela yakaimalageno Yisasi'a ani kate afumo agupifina maiteno umaine. <sup>9</sup> Hagote'ya vaya vea'mo'yaene haenagama vaya vea'mo'yaene ala kenake kefiti mage hu'ya hae “Alamogae taugafa aligatisana kanoa kanale'ya huka ne'ane. Anumayamo ali'ya alisana yafe hugategeka emainana kanomoga Anumaya Koti'a kanale manu kamino kaya humaine. <sup>10</sup> Taginagomo'a Teviti'e nayona kava huno'ma yagaimainea avamete kavala eteno ani'a huno falote hugahie. Ani yafena muse higetao. Anafinaga Anumaya Koti'a taugafa aligatisia kanohe muse hisune.” hu'ya humainae.

<sup>11</sup> Yisasi'a Yelusalemu uva'yi huteno ala mono nopi umaineno muki'a mono nopima hanea yana

ako huno ageliteno huno ageteno ne'ataleno hani kisia avamete higeno ataleno tuelufu'a (12) anaga'aene Petaniga vae.

*Yisasi'a fiki yosahe “Alaga'a o'ayo.” huno hutene.*

<sup>12</sup> Faete'ya kotige'ya Petania atale'ya ne'vageno Yisasina agatemaine. <sup>13</sup> Agategeno nagola haisa afa'a hanea fiki yosamo'a alu'ale hanegeno ageteno alaga'ahe mogegahe ani yosamo aepale uno mogeana alaga'a omalegeno haisayaga'age hane. Ani fiki yosamo'a alaga'ama ne'ayea kanamo'a yaufa falote ohune. <sup>14</sup> Mogeteno Yisasi'a ani yosahena mage huno hie “Namo yosa hetika maiyo. Agola kagai kaugafa vea'mo'ya nago'ene onegahae.” huno huhaviya hutege'ya agai'aenema tokae'ya nemaiya anaga'mo'ya ani kea havimainae.

*Yisasi'a ala mono nopi mone ali'ya ne'aliya vea'ne amanatitalene.*

<sup>15</sup> Yelusalemu eva'yi hute'ya Yisasi'a ala mono nopi haino mone ali'ya ne'aliya vea'nene afa'a miyama nehaya vea'nene “Maihaleho.” huno amanatine'ataleteno nago'a vea'mo'ya alu kotegama nehanea monea ne'ali'ya ani kotegama nehanea monea ne'amamiya vea'mogami folomoa alitalegeno aige helafige higeno kugofa kana namama miya nehaya vea'mogami sipa'amia ani'a huno alitalegeno aihelafilavimaine. <sup>16</sup> Afenoma alilite'ya nehaya veafena mage hie “Ala mono no kumapina afenona alitama ute ete ohiho.” huno hie.

17 Huteno mage huno hamapaiye “Anumaya Koti'ma humainea kemo'a auta'mafina mage huno kaemaleneane

‘Nagai nona muki'a kotega vea'mo'ya Anumaya Koti agi aye'ya havigesaya no hane.’ huno kaemaleneanagi

tamakaya musufa yama nehaya vea'mogami nomo avamete kava hutama falakitama musufa ya hugahe ma mono nopina emainae.” huno nehie.

18 Hige'ya mono note kava vaya'mo'yaene kahegi kema havilinaya anaga'mo'yaene Yisasi'ma hia ke havite'ya muki vea'mo'ya Yisasi'ma hamapaiya kema havite'ya amama'yoma aiya yafe koli hute'ya “Hana'a huta haesune.” hu'ya humainae. 19 Hayanagi Yisasi'a anaga'amo'yaene hani kige'ya Yelusalemua atale'ya umainae.

*Tamage huno ametiti huteno nunamu hisia vea'mo'a havigesia yana aligahie*

20 Yisasi'a faeteno natena agai'aenema tokae'ya nemaiya anaga'aene kate vayana anima alaga o'ayenea fiki yosa mogayana hafu'yayagafiti amagino haisamo'a amagiteno fayotemaine.

21 Yisasi'a ani yosahema humainea kehena Pita agesamo'a hao higeno haviteno Yisasife mage huno hie “Humavenelina kanomogae ago fiki yosama huhaviya hutana yosamo'a ago fa'yotemaine.” huno hie.

22-23 Higeno Yisasi'a mage huno hamapaiye “Anumaya Kotifena mage hutama hiho

‘Kagaya muki'a yana hate'asine.’ hutama tamakupi maletama tamametiti hisayana tamage hu'na tamahanepauve Anumaya Kotifena tole lamakesa ohavitama ‘Havigesua yana falote hugahie.’ hutamama hisagenofena ani yamo'a falote hugahie. Ani kava'ma hisia kanomo'a ma ago'yahena ‘Ma ago'yamoga kofa hulavika ala tikotumo amu'nopi ufaemaiyo.’ huno hapaisigenofena akave maleno ani'a hugahie. <sup>24</sup> Ani yafe mage hu'na tamahanepauve muki'a yafena Anumaya Kotitega havigesayana ‘Anumaya Koti'a kanale'ya huno lamigahie.’ hutama tamakesa havisagenofena afa'a tamamigahie.

<sup>25-26</sup> Tamakaya hetitama Anumaya Kotitegama ke hutama havigegahena hagotetama kefo yama hulamatenesaya veafena aige'amatetama kefo ya'amia atalematesagenofena ikapinaga mainea Nelamafa'a kefo yatamia aigetamateno atalela-mategahie.

*Yisasifena “Himamu yaka'a ta kamine?” hu'ya havigae.*

<sup>27</sup> Yelusalemu alehate eva'yi hayana Yisasi'a ala mono no kumapi ute ete nehige'ya mono note kava vaya'mo'yaene Yuta vayatamaene kahegi kema havilinaya anaga'ene agaitega eva'yi hae.

<sup>28</sup> Eva'yi hute'ya mage hu'ya hae “Hana augafa ala kanomo hugategeka mani kavala me nehane? Himamu yaka'a ta kamine?” hu'ya havigae.

<sup>29</sup> Hageno Yisasi'a kenona'amia mage huno hie “Nagaya hagote'na nago yafena



tamahavigesugetama nahapaisage<sup>1</sup>na nagaya ani yama talo nehua himamu'nima hanea navagea tamahapaigahue. <sup>30</sup> Yoni'a tima fale ne'amatea yana Anumaya Koti hutegeni ani kavala me nehifi afa vaya'mo'ya hutageni lina falene'amate? Tamakaya hufalote hutama nahapaiho." huno hamavige. <sup>31</sup> Hige'ya "Na'a ma'a hugahune." hu'ya mohu mehu hute'ya mage hae "Anumaya Koti hutegeni emaine." huta hisunageno'a Yisasi'a "Na'a higetama agai kea havitama tamakupina nomalae?" huno hugahie. <sup>32</sup> Hugahianagita muki'a vea'mo'ya Yonifena "Anumaya Koti aune kano maine." hu'ya tokiya'age kema nehaya yafe tagaya "Afa vaya'mo'ya hutageni emaine." huta hisunagenofena kelamakigahie huta koli nehune." hu'ya hae. <sup>33</sup> Kolia nehu'ya Yisasifena mage hu'ya hae "Tagaya ohavinonanagita hufalote huta kaha'opaigahune." hu'ya hageno Yisasi'a mage huno hie "Naha'opaisayana nagayaenena ani'a hu'na hufalote hu'na ani yama taloma nehua himamu'nima hanea navagea tamaha'opaigahue." huno humaine.

## 12

*Havi vaya'mo'ya vaini\* hoyale'ma yagaimainaya vayate avame kea humaine.*

<sup>1</sup> Yisasi'a aepa heno avame kea mage huno hamapaiye nago kanomo'a vaini\* nofi alaga hoya humaleteno kegi'ya hugove humaleneno ani alagayagamo tima'a ayelatisigeno tima'amo'a

tavino umaisia komua kafiteno yagai'yama maisaya nona anafi kimaleteno alu vayafe ke huno “Etama hoya'nile me yagaitama maineho. Ani nofi'mo alagafitila aye fako hutama nago'a aliho.” huno humateteno alu kotega umaine. <sup>2</sup> Umaineno fuma nelea kanafina ani hoyamona nefa'a nagola ali'ya kanoa hutegeno ani vaini hoyale'ma ne'yagaiya vayatega alaga aligahe umaine. <sup>3</sup> Vige'ya hoyale'ma ne'yagaiya vaya'mo'ya ani ali'ya kano'amona atafa hu'ya ka'yo amite'ya mage hae “Okamigahunagi kagaya eteka vuo.” hu'ya hageno eteno umaine. <sup>4</sup> Eteno vigeno hoyamona nefa'a alu ali'ya kano'a hutegeno viana ani'a hu'ya atafa hu'ya anu alite'ya tusi'a agaye hisifa kava hutенаe. <sup>5</sup> Hutageno vigeno eteno alu ali'ya kano'a hutegeno ani hoyafi viana atafa hu'ya hayageno falimaine. Falitegeno hoyamona nefa'a kasago'ya ali'ya vaya'yaga humatege'ya vage'ya nago'a ali'ya vayala amatafa hu'ya nehamae'ya nago'a kuyafa ne'amatale'ya nago'a tefa hamae falimainae. <sup>6</sup> Muki'a vageno hau ayamopafima nehaiya nafa'ne'a agai'age maigeno nefa'a mage huno hie “Nafa'ne'nimo kea havigahae.” huteno hutegeno haenagalafa ani hoyalega umaine. <sup>7</sup> Vige'ya ani hoyafima yagaimainaya vaya'mo'ya mage hu'ya hae “Mamona mani hoyamona nefa nafa'ne. Nefa'ma falisigenofena mani nafa'nemo'a hoya'a aligahianagita ago haetao. Haesunageno falisigeta mani hoya tagai ya

hapaegahie.” hu'ya hae. <sup>8</sup> Hute'ya atafa hu'ya hayageno falige'ya augafa'a ali'ya hoyafinagati ai halatu hu'ya malaga haga'yu hutalenaē.” huno hie.

<sup>9</sup> Huteno Yisasi'a mage huno hamavige “Na'a hayanagino hoyamona nefa'a hana'a humategahie? Eno hoya'afima yagaimainaya vayala tavata me hamaesige'ya faligahae. Fali ha'no hisageno alu vayafe “Tamakaya hoyalela kava me yagaiho.” huno humategahie.” huno hie.

<sup>10</sup> Nago'ene Yisasi'a mage huno hie “Manima Anumaya Koti avopima hanea kea ago hapalitama havimainao? Mage huno humaineane

‘Vaya'mo'ya yafa noma kiyana nago yafafena ‘Haviya humaine.’ hu'ya atalayanagi ani yafamo'a haenaga'a ‘Tusi'a kanale yafanagino amakaseno haimainea yafane.’ hu'ya nomo ayetagenale malenaē.

<sup>11</sup> Anumayamo'a ani'a humaineanagita ne'ageta tusi'a kanale ya hane huta nehune.’ hu'ya kaemalenayane.” huno hie.

<sup>12</sup> Yisasi'a mani kea hige'ya mono note kava vaya'mo'ya “Mani avame kema hiana tagaife nehie.” hu'ya amakesa havite'ya mage hae “Avaleta kina nopi ategahune.” hu'ya hayanagi alitalu humainaya veafe koli hute'ya Yisasina atale'ya umainaē.

*Sisana takisi monea amisao ifi o'amigahae?*

<sup>13</sup> Nago'a Falasia vaya'ene nago'a Heloti vaya'ene humatage'ya Yisasi'ma havigaya

keleti ayevataga hu'ya atafa hu'ya haegahe Yisasi mainelega umainae. <sup>14</sup> Umaine'ya mage hu'ya havigae “Humavenelina kanomogae tagaya ago havunana kagaya tamage'age kano mainane. Amakima hanea vaya'ene amakima omale vaya'enefena nagoke kateke'ya havi ne'amamika kelamage nehuka Anumaya Koti kea tahanepainane. Takisi monema ataleyatela Sisa'a kava kanomotega kanale atalesuno ifi o'atalesune? hu'ya havigae.

<sup>15</sup> Hageno Yisasi'a amakupinagama haviya kea ago haviteno “Vagala vaya mainetama amegati ke nehae. Na'a higetama nagaila ayenavataga hutama natafa hisaya yafena nahavinegae? Nagola alaga monea alitama me namige'na agano.” huno hie. <sup>16</sup> Hige'ya nagola alaga monea ali'ya memigeno ageteno mage huno hamavige “Mani alaga monelela ta augosaene ta agiene hane?” huno hamavigege'ya “Sisa augosaene agiene hane.” hu'ya hae. <sup>17</sup> Hageno Yisasi'a mage hie “Sisana agai'a yana agaila amiho. Nagi Anumaya Kotina agai'a yana agaila amiho.” huno hige'ya ani kehena amama'yo aimaine.

*Satusi vaya'mo'ya falimainesafiti hetisaya yafe Yisasina havigemainae.*

<sup>18</sup> Nago'a Satusi vaya'mo'ya\* Yisasitega emainae. Ani vaya'mo'ya mage nehaya vayale “Falimainaya vayala ete'ya heotigahae.” hu'ya nehaya vayale. <sup>19</sup> Vayalegi'ya Yisasina me havige'ya mage hu'ya hae “Humavenelina kanomogae Mosese'a tagaifena mage huno

kaemaleneane ‘Nago kanomona nepu'amo'a nafa'ne'la o'ate kanoa a'ama ataleno falinageno'a agana'amo'a ani aala aliteneno ago'ma falimainea kanomofe anona'la nafa'ne atesie.’ huno kaemaleneane. <sup>20</sup> Nago kanafina seveni'la (7) konaga mainayanagino nepu'amimo'a aala aliteneanagino nafa'nea o'ate kano maineno falimaine. <sup>21</sup> Falitegeno anile agana'amo'a ani aala aliteana nafa'nea ani'la huno o'atenea kano falitegeno anile agana'amo'a ani'la humaine. <sup>22</sup> Muki'la seveni'la (7) konagamo'ya aliteme aliteme ayana nafa'nea o'ate'ya fali ha'no hageno haenagalafa ani aala falimaine. <sup>23</sup> Seveni'la (7) konagamo'ya ani aala alitenayanagi falimainesafiti'ma hetisaya kanafina hana kanomo ani aala aligahie?” hu'ya havigae.

<sup>24</sup> Havigageno Yisasi'la mage huno hama-paiye “Anumaya Koti kefima kaemalenea kene tokiya yama'aenefena havilama hutama ohaviya yafe tamakaya havi tamakesage'ya nehaviye. <sup>25</sup> Veal'ma falimainesafiti hetisaya kanafina ensole vaya kana hu'ya vemo'ya aala o'aligahae. A'mo'yaenena vea o'aligahae.

<sup>26</sup> Falimainaya vea'la ete'ya hetisaya yafe nahavinegao? Mosese kaemalenea avopima ohapalinao? Nagola osi yosale'ma ala ata anefela leanagi ani osi yosa otene.” huno kaemalenea kea ohavinao?

Anumaya Koti'la ani kanafina Mosesefena mage huno humaineane “Nagaya

Apalahamunagi Aisakinagi Yekopugami Anumaya mainoe.” huno humaineane.

27 Ani anagala falimainayanagi “Nagaya Anumaya Koti'amimo'na mainoe.” huno humainea yafena amaku amamemo'a ofalinegi afa'a mainaya yafe ani kea humaine. Tamakaya vea'mo'ya he'otigahae hutama nehaya kea havige nehae.” huno hamapaimaine.

*Anumaya Kotina hagoteno tokiya'age kahegi ke'ae.*

28 Nago kanoa kahegi kema havilinea kanomo'a anile eno huge havige haya kea haviana Yisasi'a kanale kema huhaleno hamapaiya kea me haviteno Yisasifena mage huno havige “Anumaya Koti kahegi kefitila hana kemo muki'a kemona agaseno uhagoteno tokiya'age kea hane?” huno havige. 29-30 Havige-geno Yisasi'a mage huno hie “Uhagoteno tokiya'age'ma humainea kemo'a mage huno humaine

'Isaleli vayala\* haviho Anumayamo'a tagaiti Anumaya Koti'a agai'age mainegi nago'a Anumaya omaine. Kagaya Anumaya Kotikamofena kahau kayamopafina tokiya'age huno kahaino. Muki'a kagesama havisana ya'ene kagu kamema havisana ya'ene ali'ya ne'alina kayamufaene tokiya'age huka Anumaya Kotina amio.'

31 Anile nago kea mage huno humaineane

'Muki'a vayafena tusiya huno kahau kayamopafi kahaino. Kagaika kaugafahema kahaisia

avamete ani'a huno alu vea'mogami  
amaugafahena kahaino.'

Menima tole kema kahapauva kemo'a muki'a  
Anumaya Koti kahegi kemona ago amakase-  
mainea ke hane." huno hie.

<sup>32</sup> Higeno ani kahegi kema havilinea kanomo'a  
Yisasifena mage huno hie "Humavenelina  
kanomogae tamage nehane. Nagoke Anumaya  
Koti mainegi nago'a Anumaya Koti omaiye.

<sup>33</sup> Omaigi tagaya muki'a tahau tayamopafi  
tokiya'age huno tahaisigeta muki'a tagesama  
havisuna ya'ene tagu tamema havisuna ya'ene  
ali'ya ne'aluna tayamufaene tokiya'age huta  
muki'a Anumaya Kotina amisune. Amiteta  
muki'a veafena tahau tayamopafi tahainageno  
tagaiti laugafahema tahaisia avamete ani'a  
huta alu vea'mogami amaugafahena tahaisie.  
Na'ama hisuna yamo'a muki'a alu kavala  
amakasemaine. Nayona vea'mo'ya 'Anumaya  
Kotina muse yana ne'amune.' hu'ya nagola  
sipi sipi he'ya ne'ami'ya nago sipi sipia atafi kae  
sala'mana aine'atale'ya nehaya yamona menima  
kahapauva kemo'a ani kavala ago agasemaine."  
huno hie.

<sup>34</sup> Yisasi'a anima huhaleno'ma hia  
kea haviteno "Havi'yama'aene kano  
maineafenagino nahapaiye." huno agesafinaga  
haviteno kenona'a mage huno hie "Ani kema  
hana kemoga aupa'a Anumaya Kotife 'Kava  
yagainato.' huka hugane." huno hie. Hige'ya  
vaya'yagamo'ya havite'ya koli hu'ya Yisasina  
nago'ene haviokenae.

*Yisasi'a Anumaya Kotima hutenea kanohe vea'mogami hamavige.*

<sup>35</sup> Yisasi'a ala mono nopi mo humavenelino mage huno hamavige “Kahegi kema havilinaya anaga'mo'ya na'a hige'ya Kalaisifena, ‘Anumaya Koti'a hutenea kanomofena Tevitina aginagomo'a mopale kano maine?’ hu'ya nehae.” huno hamavige. <sup>36</sup> Hamavinegeno mage hie “Teviti'a Anumaya Kotina Alu Aotage Avamumo hapaiya kea mage huno humaineane

‘Anumaya Koti'a Anumaya-ni'amofena mage huno humaine “Tamaga nayatega, ala vaya mainalega hanea siale emainesanage'na kame vayaka'a kaiyafinaga amatesuge'ya kagaife ‘Ago tagasane.’ hu'ya hugahae.’ huno kaemaleneane.

<sup>37</sup> Teviti'a Kalaisife ‘Anumayani'a mainane.’ huno humainegi na'a higeno Teviti'a haenagama atesia aginagomofena ‘Anumayani'amoga mainane.’ huno humaineane?” huno hamavige. Hige'ya muki'a alitalu humainaya vea'moya Yisasi kea havite'ya tusi'a muse hae.

*Kahegi kema havilinaya anaga'mo'ya kefo ya'ene nehaya vayale.*

<sup>38</sup> Yisasi'a hamapaiya kefiti mage huno hamapaiye “Kahegi kema havilinaya anagafena ka'yeho. Ani vaya'mo'ya aya'aya kena failiya yafena ‘Nelagafi notagafi?’ hu'yama haya yafena tusiya huno nehamaiye. Vaya atagu nefaya kumapi mo vaiyatete nehu'ya ‘Na'a vaya mainae.’ hu'ya ‘Ali falu fala



hulatesae.' hu'ya nehae. <sup>39</sup> Mono nopi'ene imule'ene 'Ala vaya'age'ma nemaiya sialeke'ya maigahune.' hu'ya nehae. <sup>40</sup> Ani vaya'mo'ya keto a'neyagahena 'Mono nopima atalesaya monea tamiho.' hu'ya nehu'ya no'amifima hanea ya'yaga musufaya hu'ya mone'amia ali ha'no nehaya vayalagi'ya. Vaya'yaga ayemavataga hu'ya 'Kanale vaya mainae.' hu'ya hisae hu'ya aya'aya nunamu nehayane. Ani'ama nehaya vaya'mo'ya havi miyana tusiya huno amaugafa amagata aisia ya'ene aligahae." huno hie.

*Mone'a omale a'mo'a Anumaya Kotitega muse yama'a atalene.*

<sup>41</sup> Yisasi'a mono nopi mone ne'atalaya kaiyaga maineno monema atalaya veala amakeana mone'amima hanea vea'mo'ya "Monetia Anumaya Kotina amigahune." hu'ya ala mone pokisifina atalena. <sup>42</sup> Atalageno nagola mone'a omale keto a'mo'a tole osi haesa monea metalene. Ani haesa yafatalamogania tokaya'ageno'a vani toya kana humaine. <sup>43</sup> Yisasi'a ani yana ageteno agai'aenema tokae'ya nemaiya anagafe ke hige'ya ageno mage huno hamapaiye "Nagaya tamagelafa hu'na tamahanepauve ma ma mone'a omale keto a'mo'a hagote'yama metalaya vea'mogamina amakaseno ala mone metale. <sup>44</sup> Metaleneanagi mone'amima hanea vea'mo'ya ali'yama'a omalenea monegi'ya havigu malenaya monegi'ya afa'a metalayanagi ani a'mo'a muki'a

yama'a ali ha'no huno metale. Muki'a kave'ama alino nesia mone'a muki'a alino metale." huno hie.

## 13

*Yisasi'a "Ala mono nona tagape ailavigahie." huno humaine.*

<sup>1</sup> Yisasi'a ala mono nona ne'ataleno vigeno nagola agai'aenema tokaeno nemaiya kanomo'a mage hie "Hulavenelina kanomogae male ago. Ala yafana kanale yafa'yagaleti kimalenaya kanale no'yaga hanegeka ne'agane." huno hie. <sup>2</sup> Higeno Yisasi'a mage huno hie "Kagaya mani kanale'nale ala no'yaga ne'agano? Ani muki'a yafa'yaga alino lagape aitalessigeno aposilavisianagi nago yafamo'a nago yafamo agupifina aikalo huno omaigahie." huno hie.

*Yisasi'a "Tusi'a kana yamo falote hugahie." huno hie.*

<sup>3</sup> Yisasi'a Olivi yosa hanea ago'yamo agegay-alega haino mopale maineno ageana ala mono nona atu kaiyaga hanegeneno ne'agege'ya Pita'lene Yemesi'ene Yoni'ene Etalu'ene Yisasi'ma mainel-ega emainae. <sup>4</sup> E'ya Yisasife mage hu'ya havigae "Ani yafa nomo'a tagapema aisia kana na kanafine? Hana augafa tokiya avame yamo ani kanama falote'ma hisia kanafina taveligahie?" hu'ya havigae.

<sup>5</sup> Hageno Yisasi'a mage huno hie "Nago'a vaya'mo'ya havigema lamahapaisagetamahena ohavisaya yafe ka'ye ho. <sup>6</sup> Muki'a vaya'mo'ya nagai nagia ne'aye'ya 'Anumaya Koti'a

tamaugafa aligatisuna yafe hulategeta ne'one.” hu'yama hisayana kasago'ya vea'ne havige ayemavataga hugahae.

<sup>7</sup> “Nago'a kotega kamema nehae.” hu'ya hisagetamaene “Kotamile-gaenema kamema nehae” hu'yama tamahapaisagetamahena kolia ohiho. Ani ya'yagamo'a hagoteno falote hugahianagi ma mopama ha'no hisia kanamo'a ya'ufa falote ohune. <sup>8</sup> Nago'a vaya'mo'ya alu vaya'enena kamea hugahae. Ala kotega vaya'ene nago ala kotega vaya'enena kamea hugahae. Kasago'ya alu kote kotela tusi'a imila aligahie. Alu kote kotela tusi'a kafu nehu'ya amakatesia kanamo'a falote hugahie. Ani ya'yagamo'a afa'a a'nemo'ya nafa'nema ategahema hageno aepa heno amagata ne'aiya avamete kava hugahianagi haenaga'a tusi'a tamagata yamo falote hugahie.

<sup>9</sup> Tamakaitamia kava yagailama hiho. Nago'a vea'mo'ya tamakaila tamavale'ya kanisole vayate kaiyekea hulamategahae. Mono nopi tamavale'ya ka'yona mo lamamigahae. Nagai nakave'ma haya yafe tamavale'ya ala kava vayate'ene amakasemainea sauve vayate'ene tamavale'ya hetilamatesage'ya kaiyekea hulamatesagetama nagai kanale mono kea hamapaigahae. <sup>10</sup> Hamapaigahayanagi hagote'ya Yisasi kanale mono kea ali'ya ute ete hu'ya muki'a kote vea'mogamina hamapaitesageno ma mopamo'a ha'no hugahie. <sup>11</sup> Tamavale'yama kaiyeke hulamatesaya

kanafina kema hisaya yafena “Na'ane huta hugahune' hutama tamakesa ku'mo'a ohutama afa'a viho. Ani kanafina kanale kema hisaya kea Anumaya Koti'a tamahapainagetama hugahae. Ani kea tamakai kea omalegi Anumaya Koti Alu Aotage Avamu'mo'a huno lamakesa hinagetama hugahae. <sup>12</sup> Ani kanafina vea'mo'ya amakai'ami nepu'amimona kame vaya'amimote amavale'ya visaya'amo'ya ‘Hamaege'ya faliho.’ hu'ya hugahae. Nefa'a nafa'neyaga'a ani'a humategahae. Nafa'ne'amimo'ya ita'afo'amimo'ene-na aliyahae hu'ya kamea humatete'ya ‘Hamaetama faliho.’ hu'ya hugahae. <sup>13</sup> Nagima ne'ayaya yafe muki'a vea'mo'ya havi'ya amaipa kafa helamategahae. Nago'a vea'mo'ya nagai kemona meni kanaleti aepa he'ya atafa hu'ya tokiya'age hume hume ne'visage'na Yisasi'na ete'nama esua kanafina nagai kema atafa hulinesaya vea'mogamina Anumaya Koti'a amaku amamena aligatigahie.

*Tusi'a havi yatafa falote hugahie.*

<sup>14</sup> Yisasi'a nago'ene mage huno hie tusi'a havi yana ma mopa alino hagagitalia yana alu aotage yapi hetimainesigetama agegahae. Anima tamama'yoma aisia yama agenuta-mahena Yutia mainaya vea'mogatama tamaiyayetama ago'yalega viho. Ani Yisasi'ma humainea kema hapalitama havisamogatama havilama hutama haviho. <sup>15</sup> Nagi nago kanomo'a nogatofule'ma haino maineno ani kema

havinunofena tavino noma'afinagati haifaleno nago'a yana o'alino. Afa'a aiyayeno vino. <sup>16</sup> Nago'a vea'mo'ya hoyafinagama mainesaletila kena'amima aligahena notega ete'ya o'viho. <sup>17</sup> Avo'nio ani kanafina tusi'a havi yamo falote hugahie. Amaipaene a'nene nute anilinesia nafa'nemogami ita'amimo'yaenefena tusi'a nahau nehie. <sup>18</sup> Anumaya Kotitega nunamuna mage hutama havigeho “Ani havi yamo'a tani ko'ma ikate tisia kanafina falote ohisie.’ hutama havigeho. <sup>19</sup> Ani kanafina tusi'a kana ya falote hugahie. Ehe'ma Anumaya Koti'a ma mopama talo humalenea kanafi'ene meni kanafi'eneḡa ani'a ala kana yana falote ohuneanagi tusi'a ala kana yamo'a nago'ene haenaga'a ani'a huno falote ohugahie. <sup>20</sup> Anumaya Koti'a ani havi kanama alino aupa ohile'asina muki'a vea'mo'ya falile'asinagi Anumaya Koti'a haigeno'ma hapalimatenea veafe agesa havino amaugafa aligatisia yafe ani kana'a alino aupa hugahie. <sup>21</sup> Ani kanafina nago'a vea'mo'ya mage hugahae “Anumaya Koti'ma taugafa aligatigahie huno hutenea kanoa ma mainegi ageho. Atu mainegi ageho.” hu'ya hisagetamahena “Tamage nehae.” hutama havitama tamametitia ohiho. <sup>22</sup> Ani kanafina nago'a havige'age amaune vaya'ene “Nagaya Anumaya Koti'ma tamaugafa aligatigahie huno hunatenea kano mainoe.” huno havige hisia kanoene eva'yi hu'ya vea'mogamina ayemavataga hugahe tokiya'age avame yana hugahayanagi Anumaya

Koti'a ha'ye huno hapalimatenea vea'mo'ya ohavigahae. <sup>23</sup> Ohavigahagi falote ohunaya kanafina ago tamahapaimainogi ka'yetama maiho.

*Haenaga'a Ikapinagati emainea kanoa vaya'mo atenea nafa'nea egahie.*

<sup>24</sup> Ani havi kanamo'a ha'no hutesigeno yagemo'a hanima'age hinageno ikamo'a aivasa ohugahie. <sup>25</sup> Ka'nefi'mo'ya ikatetila atafailavigahie. Ikatema hanea ya'yagamo'ya kanage kanage huno alu kate kate vaiyegahie. <sup>26</sup> Muki'a ani yamo'a falote hutesige'na ikapinagati emainoa kanoa vaya'mo natenea kanomo'na ikapinagatila siate elavisuge'ya nagegahae. Tusi'a tokiya'niene tusi'a hale yani'aene esugetama nagegahae. <sup>27</sup> Nenagesage'na ensole vaya'nia humate-suge'ya yagemo'ma tavi nefalelegati'ene eva'yi nehilegati'ene aluga aluga haupalegati'ene muki'a mopaene mopaene nagai'ni'a nahaige'na hapalimatenoa vea'nea aluga aluga muki'a ma mopamona atupaleti'ene ikamo atupaleti'ene amavalesage'ya melitalu hugahae.

*Tamakaya fiki yosale agevame hiho.*

<sup>28</sup> Yisasi'a mage huno hie “Fiki yosamo'a nago avame ya tamaveligahigi ageho. Ani yosamo'a hageteno akopapiti'ma agusasiyeno amu'ma malesigetamahena ‘Anuna valesia kanamo'a falote hugahe nehie.’ hutama nehae. <sup>29</sup> Na'a hugahayanagi manima tamahanepauva kuguva

yama agenutamahena “Yisasi'a esia kanamo'a ago aupa higeno fiate hetino maineanagino ago egahie.’ hutama tamakesa havigahae. <sup>30</sup> Nagaya tamage hu'na tamahanepauve meni kanafima mainaya veala ofalinesageno ani yamo'a falote hugahie. <sup>31</sup> Ika'ene mopaene fanane hugahianagi nagai kemo'a fanane ohugahie.

*Ani yama falote hisia kanahena nago kanomo'a ohavine.*

<sup>32</sup> Manima tamahapauva kanama falote hisia kanahena nago kanomo'a ohavine. Ikapinaga mainaya ensole vaya'mo'ya ohavinae. Anumaya Kotina nafa'ne'amo'na ani kanama falote hisia kanahena ohavinoanagi nenafa'a agai'age havi-line.

<sup>33</sup> Tamakaya ani kanama falote hisia kanahena ohavinaya yafe tamaula ofaetama tamakaitamile yagaiho. <sup>34</sup> Nago kava kanomo'ma hia kava huno Yisasi'a egahie. Ani kava kanomo'a ali'ya vaya'amofena ‘Ma ali'yana alu ali'ya alu ali'yana tamahaote tamahaote yagaitama maiho.’ hune'amateno “Fiate'ma mainamoga kagaika'a yagaiyo.” hune'ateno ataleno alu kotega umaine. <sup>35</sup> Na'a humaineafe tamakaya ani'a hutama yagaiho. Nomona nefa'ma esia kanahena ohavinae. Une esio? Kege amu'nopi esio? Kokolemo'a age ne'aisigeno esio? Ifi nate esio? Esia kanahena ohavinaya yafe kava yagaitama maiho. <sup>36</sup> Faetama mainesageno havigu aupa'a esigetama tamakaye hu yafenagi ka'yetama maiho. <sup>37</sup> Mani kea tamakaifema

hua kea muki'a vea'mogamife nehugi kava ya-gaitama tokiya'age hutama maiho.” huno hama-paiye.

## 14

*Kava vaya'mo'ya Yisasina haesaya ke hu ha'ya kimainae.*

<sup>1</sup> Ani kanafina tole yupa maite'ya kafu'ahe kafu'ahe Anumaya Koti'ma amakinagomo amau-gafama aligatimainea yafe\* alitalu hu'ya hale oki kaihamena nenaya imu kigahe nehage'ya mono note kava vaya'mo'yaene kahegi kema havilinaya anaga'ene Yisasina haesaya kea kesi ako hu'ya atafa hisaya yafe ke huge hav-ige humainae. <sup>2</sup> Mage hu'ya hae “Muki'a veala imule'ma alitalu hu'ya maisafima Yisasina atafama hisunage'ya muki'a vea'mo'ya agete'ya ke hu'ya atile male hu'ya tu hugahae.” hu'ya hae.

*Nago a'mo'a Yisasina anupi masave takino faletene.*

<sup>3</sup> Yisasi'a Petani umaineno nayona fugitaya agemainea kanomo agia Saimoni'e kanomo nopi umaine. Mopale umaineno kave nenegenonago a'mo'a anile eno mana'age masavena havatemai yafa ke'ayola alilino emaine. Ani ke'ayopina nagola tusi'a monele hanea masavena mana'age tina hane. Ani limo agia natie. Ani ke'ayo'ma taloma hia yafamo agia alapasata yafane. Ani a'mo'a masave ke'ayola alino aitagino Yisasi anupi takino faletene. <sup>4</sup> Faletege'ya nago'a anile mainaya vaya'mo'ya agete'ya ke vai'ya



mohu mehu nehu'ya mage hu'ya hae “Na'a higeno mani a'mo'a mana'age masavena afa'a ne'atale? <sup>5</sup> Nago kanomo'ma miya hile'asina tali hataleti kina (K300) alute'asine. Aliteta ani masavete monea alita afeno'amima omalenea vea'nea amamute'asine.” hu'ya ani a'mofena “Kefo kava talo hane.” hu'ya kemakimainae. <sup>6</sup> Ke ne'amakigeno Yisasi'a mage huno hie “Agaila afa'a ataleho. Na'a higetama kea ne'amakiye? Ani a'mona aipamo'a haviya hisia kava nehagi nagaila tusi'a kanale kava hunenate. <sup>7</sup> Afeno'amima omalenea vea'mo'ya muki'a kanafina tamakai'ene maigahayanagitama amaya hisaya tamakesama havisayana amaya hugahayanagi nagaya tamakai'enena muki'a kanafina omaigahue. <sup>8</sup> Ani a'mo'a amuko'a hanegeni ani kavala hagoteno afa'a ofali'na mainogeno masavema fale'ya hevainatesaya masavena agola fale nenate. <sup>9</sup> Tamage hu'na tamahanepauve muki'a ma mopafi veapima Yisasifena kanale mono kema hamapaisayana ani a'mo'ma hia kavafe'enena hamapaisage'ya muki'a vea'mo'ya agaiife amakesa havi havi hu'ya maigahae.” huno hie.

*Yutasi'a hulamake huno kava vayafe “Yisasina avale'na tamamigahue.” huno hamapaimaine.*

<sup>10</sup> Ani kanafina Yutasi Isakalioti'a tuelfu'la (12) anaga'aene nemaiya kanomo'a via'amo Yisasina agesi huno momavalesige'ya metafa hisaya yafe mono note kava vayatega umaine.

<sup>11</sup> Via'amo mo hamapaige'ya ani kea havite'ya

tusi<sup>1</sup>a muse hute<sup>1</sup>ya ‘Mone kamigahune.’ hu<sup>1</sup>ya hapaitageno Yutasi<sup>1</sup>a vava kuluta o<sup>1</sup>ai yate kesi kateti momavaleno esige<sup>1</sup>ya Yisasina haesaya kafe atiyemaine.

*Yisasi<sup>1</sup>a agai<sup>1</sup>aenema tokae<sup>1</sup>ya nemaiya anaga<sup>1</sup>aene kavela nemainae.*

<sup>12</sup> Hale oki kaihome kana maya nenaya kanamo<sup>1</sup>a ehe kanale Anumaya Koti<sup>1</sup>a Yuta vava amaugafama aligatimainea kanahe amakesa nehaviya imuma kigahena sipi sipi he<sup>1</sup>ya ki<sup>1</sup>ya nenaya kanamo<sup>1</sup>a falote hige<sup>1</sup>ya Yisasi<sup>1</sup>ene tokae<sup>1</sup>ya nemaiya anaga<sup>1</sup>mo<sup>1</sup>ya Yisasina mage hu<sup>1</sup>ya havigae “Hanatega kahaisia kumatela Anumaya Koti<sup>1</sup>a amaugafama aligatimainea kanahe kagesa havisana kavela mo lalo tala hisune?” hu<sup>1</sup>ya hae. <sup>13</sup> Hageno Yisasi<sup>1</sup>a tole kanolatana hunateno mage huno hanapaiye “Ala kumate ne<sup>1</sup>vi<sup>1</sup>ageno ti ke<sup>1</sup>ayo<sup>1</sup>ma alino esia kanoene fotu hutetana akave vi<sup>1</sup>o. <sup>14</sup> Akave ne<sup>1</sup>vi<sup>1</sup>ageno haino mo falesia nopi haitana ani nomona nefafe mage hutana havige<sup>1</sup>o ‘Hulavenelia kanomo<sup>1</sup>a mage hie ‘Hanate ayenalagimalenana nona hane? Yoka namisanage<sup>1</sup>na nagai<sup>1</sup>ene tokae<sup>1</sup>ya nemaiya anaga<sup>1</sup>niene Anumaya Koti<sup>1</sup>a amaugafama aligatimainea kanahe tagesa havisuna kavela nesune?’ huno hie.’ hutana havige<sup>1</sup>o. <sup>15</sup> Hisa<sup>1</sup>ageno<sup>1</sup>a folamo huno anale kimalenea nona ago alino hilato humaleneanagino ala nona tanavelisigetana kavetia talo tala hi<sup>1</sup>o.” huno hanapaiye. <sup>16</sup> Hige<sup>1</sup>ana ala kumate

va'ana Yisasi'ma hia kemo'a muki'a falote hige'ana agete'ana Anumaya Koti'a amaugafa aligatimainea kanahe amakesa havi havi hisaya kavela talo tala humaina'e.

<sup>17</sup> Talo humalena'age'ya yagemo'ma tavi faleama'a Yisasi'a tuelufu'a (12) anaga'amo'yaene emainae. <sup>18</sup> Mopale emaine'ya kavela nenageno Yisasi'a mage huno hie “Tamage hu'na tamahanepauve nagai'enema kave'ma nenaya anaga'mogatama tamakaipiti kesi nahaesaya yatela nago kanomo'a vaine'aye.” huno hie. <sup>19</sup> Hige'ya ani anaga'mo'ya amaipa haviya hute'ya agaifena amahaote amahaote mage hu'ya hae “Nagaife nehano?” hige'ya “Nagaife nehano?” hige'ya hu'ya havigae. <sup>20</sup> Havigageno Yisasi'a mage huno hie “Tamakaya tuelufu'a (12) anaga'nimogatama tamakaipiti nagoke'moga kesi nahaesaya katela vaine'ayane. Ani kanomo'a nagai'ene nagoke yopafiti kaihame kana maya ali vayagofino nene. <sup>21</sup> Nagaya ikapinagati emainoa kanoa vaya'mo natenea nafa'nemonihena Anumaya Koti auta'mafima kaemalenaya avamete kava hugahuanagi vaya'mo'ya havisagi huno nagesi hunatesia kanomofena 'Avo'nio nahau hanagi kagaya maiga'yeka mainekao.' hu'na nehue. Ani kanomoga itakamo'a okatenele'asina tusi'a kanale kava hile'asine.” huno hie.

*Yisasi'a kaihame kana mayaene nofi alagamo ti'ene amamine.*

22 Ani kavela nenageno Yisasi'a kaihame kana maya alino nunamu huteno muse huno havigeno kolite kolite huno ne'amamino mage huno hie "Aliho. Mamona nagai'ni naugafae." huno hie. 23 Nagola vaini nofi alagamo ti\* hanea ke'ayola aliteno nunamu huno muse huno havigeno alino amamite amamite hige'ya nemainae. 24 Nenageno Yisasi'a mage huno hie "Mamona nagai'ni kolane. Vaya'mo'ya nahaesage'na falisugenoko kolani'amo'a takilavino muki'a veafene huno takilavisia yafe Anumaya Koti'a hulokiya vaino alino halegafilamatenea kemo\* aepamo'a alino fatago hugahie. 25 Tamage hu'na tamanepauve menia nagaya vaini nofi alagamo tima'a\* nago'ene onegahuanagi'na Anumaya Koti'ma kava yagaimainea kumate umaine'na haegafa nofi alagamo tina\* ete'na negahue." huno hie. 26 Hige'ya yageamea nagola hute'ya Olivi yosa hanea ago'yafi haimainae.

*Yisasi'a Pitafe "Kakave'no hunategane." huno hie.*

27 Yisasi'a mage huno hamapaiye "Tamakaya muki'amogatama nagai'fe havitama tamakupi maletama tamametiti nehaya yana ataletama asaga hulavisagi nayona ani yafe kaemaleneane 'Nagaya sipi sipi kava kanoa haesuge'ya sipi sipyaga atagufe'ya falegahae.' huno kaemaleneane.

28 Kaemaleneanagi falimainesufiti Anumaya Koti'a alino hetinatesige'na Kalili uhagotelamate'na visuetama nakave egahae." huno

hie. <sup>29</sup> Higeno Pita'a kenona'a mage huno hie “Muki'a anagala kagaifema havi'ya amakupi male'ya amametiti nehaya yama atale'ya falesage'nahena nagaya ani'a ohugahue.” huno hie. <sup>30</sup> Higeno Yisasi'a mage huno hie “Tamage hu'na kahanepauve meni kegela kokolemo'a tole kanale agea o'ainesigeka kagaya tagufa (3) kanale mage hugane ‘Nagaya o'agenoa canoe.’ huka avane hunategane.” huno hie. <sup>31</sup> Higeno Pita'a tokiya'age ke huno hie “Kagai'ene nahaesage'na faligahuanagi'na kagai kagihena avanena hu'na fala okigahue.” huno hige'ya muki'a anaga'mo'ya nagoke kege'ya humainae.

*Yisasi'a Ketesemani hoyafi nunamu mo humaine.*

<sup>32</sup> Hute'ya Ketesemani uva'yi hageno Yisasi'a agai'aenema tokae'ya nemaiya anagafena mage huno hie “Tamakaya male maineho. Nagaya Anumaya Kotitega nunamu hu'na havigegahue.” huno hie. <sup>33</sup> Pita'ene Yemesi'ene Yoni'ene amavaleno viana aepa heno aipamo'a kana'age higeno haumana halegeno kasageke hie. <sup>34</sup> Huteno mage huno hamapaiye “Nahau nayamopamo'a tusi'a kana'age nehige'na ago falisua kava nehugi male mainetama kava yagaitama maineho.” huno hie. <sup>35</sup> Osi'a via'amo nunamu huno havigegahe mopafi ago'ya moyeno maineno nunamuna mage huno havige “Kahaisigekahena falisua kana'nia alitalesane hu'na kahavinegoe. <sup>36</sup> Nenafagae kagaya muki'a yana kanale hate'asine. Nagaya falisua kava

nehugi ani havi kanamo'a satu'age hia ti kana tima hanea ke'ayola nahafaletalo. Afa'a nagai nagu nagesa akave ohuka kahaisia yana afa'a huo." huno havige.

<sup>37</sup> Havigeteno via'amo momakeana agai'aenema tokae'ya nemaiya anagala fae'ya mainageno Pitafena mage huno hie "Saimonigae faekage mainano? Vae kagaya aupa kana kano'a kava o'yagaikage mainano? <sup>38</sup> Satani'a ayelamavataga hisigeno tamaku'amo'a 'Ohugahue.' huno tokiya'age humaineanagi afa'a amega tamaugafamo'a tokiya'a omaleneanagino 'Hugahue.' huno hisia yana hugahigi Satani kema ohavisaya yafena kava yagaitama mainetama Anumayamotega ke hutama havigeho." huno hamapaiye.

<sup>39</sup> Huteno amataleno via'amo Anumayamotega havigea kea ani'a huno nago'ene mo havige.

<sup>40</sup> Havigeteno eteno momakeana amau tokotoko hige'ya fae'ya mainageno momakeanagi "Vae tagaya na'ane hisune?" huge'ya amakesagu'mo humainae.

<sup>41</sup> Hageno Yisasi'a eteno ea'amo tagufa (3) kanale amakaifena mage huno hamavige "Maifalu hutamage faetama mainao? Hailagino kana'nia ago falote nehie. Nagaya ikapinagati emainoa kanoa vaya'mo natenea nafa'nemonia nagesi huno navaleno kefo yama nehaya vaya'mogami amayapi natesige'ya nahaegahe nehae. <sup>42</sup> Muki'amogatama hetitama vigetao. Ageho nagesi huno nahaesia kanoa ago ne'egi

vigeta mogamano.” huno humaine.

*Yutasi'a Yisasina avaleno kame vava amayapi atene.*

<sup>43</sup> Yisasi'a mani kea nehigeno aupa'a Yutasi'a tuelufu'a (12) anaga'aenema tokaeno ne-maiya kanomo'a eva'yi hige'ya agai'ene muki'a vava'yagaene mono note kava vava'ene ka-hegi kema havilinaya anaga'ene nago'a Yuta vayatamaenema humataya vava'mo'ya aya'aya naepege naepege hu'ya muki ka'yo'ene ali'ya emainae. <sup>44</sup> Agesi huno Yisasina haesaya yama amavalisea kanomo'a vava'yagahena mage huno hamapaiye “Atako'ma hisua kanoa haesaya kano mainegi atafa hutama tokiya'age hutama avale-tama viho.” huno hamapaiye.

<sup>45</sup> Yutasi'a eva'yi huno Yisasite ea'amo mage hie “Hulavenelina kanomogae.” nehuno atako me hie. <sup>46</sup> Atako hige'ya agete'ya vava'yagamo'ya Yisasina atafa hu'ya ayetalako humainae. <sup>47</sup> Atafa nehageno nagola agai'aenema hetimaiya kanomo'a aya'aya naepe'a hevayu huno ala mono note hagote kava kanomo ali'ya kano'amo agesa aifakalitalegeno asaka hulavimaine. <sup>48</sup> Aifakalitegeno Yisasi'a mage huno hie “Tamakaya nagaifena ‘Vava nehamaeno musufaya nehia kano maine.’ hutama nagai'ma natafa hugahena aya'aya naepene muki ka'yo'ene alitama ne'ao? <sup>49</sup> Muki'a kanafina efi'efi hu'na tamakai'ene maine'na ala mono nopina mono kea huhale'na nehuanagi nagaila natafa ohunayanagi afa'a

kanalele. Nayoma kaemalenaya kemo'a falote huno tamage hisia yafe menia natafa nehae.” huno hie. <sup>50</sup> Hige'ya muki'a agai'aenema tokae'ya nemaiya anagala ne'atale'ya fale ha'no humainae.

*Nago neya kanomo'a koli huno falemaine.*

<sup>51-52</sup> Nago neyamo'a aye ohati kena kenalafama'age failino Yisasi akave umainege'ya agaila atafa hugahe hageno kena'a hateno ne'ataleno augafa alapa'age aiyayeno faleno umaine.

*Yisasina kanisole vaya amaulagale kaiyekea hutena.*

<sup>53</sup> Yisasina avale'ya ala mono notela hagote kava kanomote age'ya mono note kava vaya'yagaene Yuta vayatamayagaene kahegi kema havilinaya anaga'ene alitalu hu'ya mainae. <sup>54</sup> Pita'a akave anatino vianagi avatela o'unegi alu'ale umaineno ala mono notela hagote kava kanomo nomo haupale uva'yi huno ati vaya'ene mopale umaineno atale tota huno maine.

<sup>55</sup> Mono note kava vaya'mo'yaene muki'a kanisole vaya'ene Yisasi'ma haesaya kaiyekema hutegahena nago'a vaya'mo'ya “Kefo kavala higeta agemainone.” hu'ya hutesaya vayafe atiyayana omainae. <sup>56</sup> Omaige'ya kasago'ya vaya'mo'ya havige hu'ya Yisasifena hayanagi amakai kemo'a nago katela ohunagi alu ke alu ke mai'ya humainae. <sup>57-58</sup> Nago'a vaya'mo'ya heti'ya havige hu'ya Yisasifena mage hu'ya hae “Tagaya agai'ama humainea kea havilinone



mage huno humaine ‘Nagaya vaya<sup>1</sup>mo<sup>1</sup>yama ki-malenaya ala mono nona ali<sup>1</sup>na lagape aitale<sup>1</sup>na tagufa (3) kanafi ani nona ete<sup>1</sup>na vaya<sup>1</sup>mo<sup>1</sup>ya nokiya avamete no ali hetigahue.’ huno higeta havilinone.” hu<sup>1</sup>ya nehae. <sup>59</sup> Hayanagi ani kemo<sup>1</sup>a nago avamete kea ohunagi alu ke alu ke mai<sup>1</sup>ya humainae.

<sup>60</sup> Hageno ala mono notela hagote kava kanomo<sup>1</sup>a amu<sup>1</sup>no<sup>1</sup>amifi hetimaineno Yisasina mage huno havige “Na augafa ke kagaifena nehae? Kagaifena kaiyekema hunegatayana kenona<sup>1</sup>amia hufalote huka nohane?” huno havige. <sup>61</sup> Havigeanagi Yisasi<sup>1</sup>a kea ohuno avaya lukino maineno nagola osi ke kano<sup>1</sup>a ohutafa huno mainegenon ala mono notela hagote kava kanomo<sup>1</sup>a eteno nago<sup>1</sup>ene havige “Kagaya Anumaya Koti<sup>1</sup>a taugafa aligatigahema hugatenea kano mainano? Kagaya agima alisaga nehaya Anumaya Kotina nafa<sup>1</sup>ne<sup>1</sup>amoga mainano?” huno havige. <sup>62</sup> Havigeveno Yisasi<sup>1</sup>a hufalote huno hie “E, nagaya ani kano mainoanagitama tamakaya haenaga<sup>1</sup>a Ikapinagati emainoa kanoa vaya<sup>1</sup>mo natenea nafa<sup>1</sup>nemonia tusi<sup>1</sup>a tokiya yama<sup>1</sup>a hanea Anumaya Kotina tamaga ayatega hanea siale maine<sup>1</sup>na ikate hanea siate esugetama nagegahae.” huno hie. <sup>63</sup> Higeno ala mono notela hagote kava kanomo<sup>1</sup>a ani kea havigeno aipamo<sup>1</sup>a tokiya<sup>1</sup>age higeno kena<sup>1</sup>a alino hatata nehuno mage huno hie “Tagaya hai havunanagi<sup>1</sup>ya nago<sup>1</sup>a vaya<sup>1</sup>mo<sup>1</sup>ya kaiyekea huo<sup>1</sup>atesae. <sup>64</sup> Anumaya Kotifema huhaviya

hutea kea ago nehavigi. Na tamakesa nehaviye?” huno hige'ya mage hu'ya hae “Tamage nehane anona yama'a alisia yafe haesageno falisie.” hu'ya hae.

<sup>65</sup> Hute'ya nago'a vaya'mo'ya Yisasina amavetu'na hene'ate'ya aulagafi aiso hutene'ya aikoneli'ya mage hu'ya havigae “Kaune kema nehana kanomoga tahapaiyo ta'ya negahayae?” hu'ya havinege'ya ati vaya'mo'ya amayateti aikolimainae.

*Pita'a Yisasifena avane huno “Nagaya no'agoa kano maine.” huno hie.*

<sup>66-67</sup> Pita'a nomo haupalega afetega mainegenon ala mono notela hagote kava kanomona ali'ya muna'mo'a anile emaineno ageana Pita'a ata lota nehigeno ani muna'mo'a megeteno Pitana agesagali maineno mage huno hie “Kagayae-nena Nasaleti Yisasi'ene vaiyatete nehana kano.” huno hie. <sup>68</sup> Higeno Pita'a avane huno “A'ao nagaya ani kanoa o'agenoa kanohe maika nehane.” huno nehuno fiate ne'vigeno anile kokolemo'a agea aimaine. <sup>69</sup> Fiate mainegenon ani muna'mo'a mogeteno anile hetimaiya vayafena mage huno hie “Mani kanoa Yisasi anagapiti kano.” huno hie.

<sup>70</sup> Higeno Pita'a nago'ene eteno “A'ao nagaya ani kanoa omainoe.” huno hie. Osi kana kano'a maige'ya anile hetimaiya vaya'mo'ya mage hu'ya hae “Tamage kagaya Kalili kano mainana yafe agai'ene vaiyatete nehana kano mainane.” hu'ya hae. <sup>71</sup> Hageno Pita'a mage

huno hie “Nagaya tamagama ohisugeno<sup>1</sup>a Anumaya Koti<sup>1</sup>a nahaesie. Anumaya Koti aulagafina tamage hu<sup>1</sup>na tamahanepauve tamakayama haya kanoa nagaya o<sup>1</sup>agenoa canoe.” huno hie. <sup>72</sup> Nehigeno aupa<sup>1</sup>a hagoteno agema aiya kokolemo<sup>1</sup>a anile via<sup>1</sup>amo agea aigeno Pitana agesamo<sup>1</sup>a aikalo higeno Yisasi<sup>1</sup>ma hapaigno havimainea kea mage huno humaineane “Kokolemo<sup>1</sup>a tole kanale agea o<sup>1</sup>ainesigeka kagaya tagufa (3) kanale avane huka nagaifena ‘No<sup>1</sup>agoa kano maine.’ huka hugane huno humainea kemo<sup>1</sup>a Pita agesamo<sup>1</sup>a aikalo higeno haviteno tusi<sup>1</sup>a avitemaine.

## 15

### *Yisasina avale<sup>1</sup>ya Pailatite umainae.*

<sup>1</sup> Kola alino halege<sup>1</sup>ya muki<sup>1</sup>a mono note kava vaya<sup>1</sup>ene Yuta vayatamaene kahegi kema havilinaya anaga<sup>1</sup>ene kanisole vaya<sup>1</sup>ene Yisasina haesageno falisia kea huge havige hute<sup>1</sup>ya Yisasina nofi kitete<sup>1</sup>ya ala kamani kava kanole, Pailatite\* avale<sup>1</sup>ya ayapi motenae. <sup>2</sup> Motageno Pailati<sup>1</sup>a Yisasifena mage huno hie “Kagaya Yuta vea<sup>1</sup>mogami Sauve kano mainano?” huno havigegenno Yisasi<sup>1</sup>a mage hie “Kagaika<sup>1</sup>a ani kea hai nehane.” huno hie. <sup>3</sup> Hige<sup>1</sup>ya mono note kava vaya<sup>1</sup>mo<sup>1</sup>ya kasago<sup>1</sup>ya kea “Ma<sup>1</sup>a kefo kava humainane.” hu<sup>1</sup>ya hutenae. <sup>4</sup> Hune<sup>1</sup>atageno Pailati<sup>1</sup>a nago<sup>1</sup>ene mage huno hie “Havio muki<sup>1</sup>a kefo yama nehana yana ali falote nehagi kagaya kenona<sup>1</sup>amia na<sup>1</sup>a higeka nohane?” huno hie.

<sup>5</sup> Hianagi Yisasi'a kenona'a nagola osi ke kano'a ohigeno Pailatina ama'yo aimaine.

*Pailati'a Yisasife “Yafaga yosale nili hetama asaigeno falino.” huno hie.*

<sup>6</sup> Kafu'ahe kafu'ahe Anumaya Koti'a amaugafama aligatimainea kanahe amakesa havi'ya imua negiyanagino Pailati'a muki'a ani imu kisaya kanafina nagoke nofi hutegenonemaiya kanoa vaya'yagamo'ya haesaga hu'ya “Agaya esie.” hu'ya haya kanohe nofipitila “Hai ha'no hanagi vuo.” huno hune'atea kanae. <sup>7</sup> Ani kanafina nago kanomo agia Palapasi'e kamani vaya'ene tuma nehaya vaya'ene maineno tuma haya kanafina vayala tavata nehamaeyaya vaya'ene mainege'ya kina nopi avale'ya hutenayane. <sup>8</sup> Hutenayanagi'ya vaya'yagamo'ya Pailatife mage hu'ya me hae “Muki'a imuma kina kanafima nehana kavala hulato.” hu'ya hae. <sup>9</sup> Hageno Pailati'a mage huno hamavige “Nagaya Yisasifena Yuta veate Sauve kanomofe ‘Hai ha'no hanagi vuo.’ hu'na hisugetama musena hugahao?” huno hamavige. <sup>10</sup> Hige'ya mono note kava vaya'mo'ya ma amakesa haviye “Muki'a veala Yisasi kege'ya nehavi'ya tagai kea nohaviye.” hute'ya ani yafe Yisasifena amaipamo'a haviya hutete'ya Pailatite avale'ya ageno Pailati'a ani yafe agesa nehavino humane. <sup>11</sup> Havianagi mono note kava vaya'mo'ya muki'a vaya'mogami amaipa moye'ya mage hu'ya hamapaiye “Mage hutama hiho ‘Palapasina atalesanageno afa'a esie.’ hutama hiho.” hu'ya

hae. <sup>12</sup> Hageno Pailati'a vaya'yagahena mage huno hamavige “Ani'a hisuana ma kanomofe tamakaya Yuta vayate Sauve kano maine hutama nehaya kanomofena na'a hutesue?” huno hamavige. <sup>13</sup> Hamavigege'ya muki'a vaya'mo'ya ala kefiti mage hu'ya hae “Yafaga yosale nili hetama asaigeno falino.” hu'ya hae. <sup>14</sup> Hageno Pailati'a mage huno hamavige “Na'a higetama na kea nehae? Hana'a augafa kefo kava humaine?” huno hianagi amakaya ete'ya ali'ya alapi atale'ya ala kefiti mage hu'ya hae “Yafaga yosale nili hetama asaigeno falino.” hu'ya hae. <sup>15</sup> Hageno Pailati'a muki'a vaya'mo'ya muse hisaya kava hugahue huno Palapasina nofipiti avaleno ne'ataleno Yisasina agata aisifa ka'yoteti haifu amiteno Yisasina ati vaya amayapi ateteno “Yafaga yosale nili hetama asaigeno falino.” huno hie.

*Ati vaya'mo'ya Yisasina hu'ya akaya atenae.*

<sup>16</sup> Ati vaya'mo'ya Yisasina avale'ya ala kava kanomo no haupalega umaine'ya muki'a amakai'ene nemaiya ati vayafe ke hage'ya emainae. <sup>17</sup> Emaine'ya Yisasina akaya ategahe “Ala kano mainane.” hu'ya hisaya yafe aya'aya haesa kena ali'ya faitete'ya aveta'nafa'age nofi ali'ya mo aigalaki me aigalaki hu'ya tumano kula talo hu'ya Yisasina anute vaitenae. <sup>18</sup> Vaitete'ya aepa he'ya huhaviya hutegahena mage hu'ya hae “Felugae. Yuta vaya'mogami sauve kanomogae.” hu'ya akaya atae. <sup>19</sup> Ne'ate'ya anute ka'yoteti nago'ene nago'ene hu'ya aikoneli'ya augafale

amavetu'na hene'ate'ya amale'ya aye'ya mopale maine'ya “Ala kano mainane” hu'ya ayevataga vatago humainae. <sup>20</sup> Kigi hune'ate'ya haesa kena hatene'atalete'ya agai'a kena faitete'ya yafaga yosale nili hegahe avale'ya umainae.

*Yisasina yafaga yosale nili he'ya asaimainae.*

<sup>21</sup> Kategama vayana Saimoni'ene fotu humainae. Ani kanoa Sailini kumate kanoe. Alekasata'ene Lufasiganiene ne'anafa'e. Ani Saimoni'a hoyafinagati kate ene'vige'ya ati vaya'mo'ya tokiya'age ke hu'ya “Kaiyayeka yafaga yosa melika vuo.” hu'ya hageno molino umaine.

<sup>22</sup> Alino vige'ya Yisasina avale'ya vaya'amo'ya Kologota kumate uva'yi hae. Ani kuma'mo agimo'a tagaiti kefina anu ayamufa kumale hu'ya nehae. <sup>23</sup> Ani ati vaya'mo'ya “Haesunageno falisiana agata ai yafenagita agatama o'aisia tina amisunageno nesie.” hu'yama hayana anima agata o'aisia timo agia mea. Mea'ene nofi alagamo ti'ene nagopi ali havigu hute'ya ali'ya amiyana Yisasi'a ani tifena “A'ao.” huno onene. <sup>24</sup> Onege'ya yafaga yosale nili he'ya asaimalete'ya kena'a fako hu'ya aligahe musufa yama nehaya yokalo lage'ya amakasaya vaya'mo'ya alimainae.

<sup>25</sup> Natena naeni (9) kiloki yagemo'a anale hai va'yi hige'ya Yisasina yafaga yosalela nilia male'ya hete'ya asaimainae. <sup>26</sup> Asaite'ya “Ma kava higeta haune.” hu'ya kaemalenae “Mani kanoa Yuta veate ala Sauve kanoe.” hu'ya

kae'ya malenae. <sup>27-28</sup> Kaemaletē'ya Yisasi'ene tole kanolatana vāya nehamae'ana musufa yama neha'la kanolatana nago kanoa Yisasina tamaga kaiyaga'la hae'ya asaimale'ya nago kanoa haoga kaiyaga'la hae'ya asaimale'ya humainae.

<sup>29</sup> Humalenage'ya kate'ma ute ete hu'ya agasaya vāya'mo'ya amake'ya ka'yo ai'ya “Kefo kano maine.” hu'ya kigi yokalofiti huhaviya hune'ate'ya mage hu'ya hae “Oho kagaya ‘Ala mono nona ali'na lagape aitaletē'na tagufa (3) kanafi ete'na kitalegahue.’ huka nehana kano mainane? <sup>30</sup> Menia kagaya yafaga yosa ne'ataleka kagaika'la elavika kaugafa aligatio.” hu'ya hae. <sup>31</sup> Hage'ya mono note kava vāya'ene kahegi kema havilinaya anaga'ene amakai'ami vāya'mo'yaene ani'la hu'ya kamuge hatage'ya vaine'ate'ya mohu mehu hu'ya huhaviya hune'ate'ya mage hu'ya hae “Nago'la vea amaugafa aligatimainegi na'la higeno agai'la augafa ali nokatie. <sup>32</sup> Kalaisiga Isaleli vayate Sauve kano'amimoga yafaga yosa ne'ataleka elavigeta agamano. Agesunana kagaifena havita tagupi maleta tametitā hugahune.” hu'ya huhaviya hune'atageno agai'enema yafaga yosale'ma asaimalaya musufa kanolatamoganienena ani'la hu'ana Yisasina huhaviya hutena'le.

*Yisasi'la ago falie.*

<sup>33</sup> Yagemo'la euno amu'noka'no higeno hale-mainea yamo'la ha'no higeno muki'la kotega

tusi<sup>1</sup>a hanikino via<sup>1</sup>amo une kanalega eteno ali halemaine. <sup>34</sup> Une kanalega Yisasi<sup>1</sup>a ala kefiti ke huno agai<sup>1</sup>a kefiti mage huno hie “Eli Eli lema sapakatani.” huno hie. Tagaiti kefina mage huno hie “Anumaya Koti<sup>1</sup>nimogae, Anumaya Koti<sup>1</sup>nimogae na<sup>1</sup>a higeka nagaila nenatalane?” huno hie. <sup>35</sup> Hige<sup>1</sup>ya nago<sup>1</sup>a anile hetimaiya vea<sup>1</sup>mo<sup>1</sup>ya havite<sup>1</sup>ya mage hu<sup>1</sup>ya hae “Ilaiyafe ke nehigi haviho.” hu<sup>1</sup>ya hae. <sup>36</sup> Hageno nago kanomo<sup>1</sup>a via<sup>1</sup>amo hava ko<sup>1</sup>yafa kana yana alino atu<sup>1</sup>age nofi alagamo tipi ayeteno alino via<sup>1</sup>amo kupaga ka<sup>1</sup>yote maleno ani hava ko<sup>1</sup>yafa kana yana kiteno “Yisasi<sup>1</sup>a mayu mayu huno nesie.” huno ne<sup>1</sup>amino mage huno hie “Agava maineta agesune Ilaiya<sup>1</sup>a yafaga yosaletila mevaleno elavisifi agegahune.” huno hie. <sup>37</sup> Higeno Yisasi<sup>1</sup>a ala kegefa huteno falimaine.

<sup>38</sup> Faligeno<sup>1</sup>a ala mono nopima ala kena aya<sup>1</sup>aya kenagefama asaimalenaya kenamo<sup>1</sup>a Yisasi<sup>1</sup>ma falia kana kano<sup>1</sup>ale analeti aepa heno amu<sup>1</sup>nopiti hatata hulole hulavino mo talene. <sup>39</sup> Ati vayate kava kanomo<sup>1</sup>a Yisasina aulega hetimaineno Yisasi<sup>1</sup>a kema huteno falia yana ageteno mage huno hie “Tamage huno mani kanoa Anumaya Koti nafa<sup>1</sup>nelafa maine.” huno hie.

<sup>40</sup> Nago<sup>1</sup>a a<sup>1</sup>neyaga alu<sup>1</sup>ale maine<sup>1</sup>ya agemainae. Nago<sup>1</sup>amogami amakia, osi Yemesi<sup>1</sup>ene Yosefegani ita<sup>1</sup>animo<sup>1</sup>a Malia<sup>1</sup>e Salomi<sup>1</sup>agi Magatala kumate Malia<sup>1</sup>agi hu<sup>1</sup>ya mainae. <sup>41</sup> Yisasi<sup>1</sup>a Kalilima mainea kanafina ani a<sup>1</sup>neyagamo<sup>1</sup>ya akave vaiyatete nehu<sup>1</sup>ya kavela



kae'ya ne'amiyane. Muki'a a'neyaga Yisasi'ene Yelusalemu tokae'ya umainaya a'neyaga alu'ale hetl'ya maine'ya Yisasina agemainae.

*Yisasina yafa kapi hevaitenae.*

<sup>42-43</sup> Sapati yupahe havi'ya talo tala hisaya kanagino yagemo'a lavi falegahe higeno Yosefe'a Alimatia kumate kanoa Yuta kanisolefi nemaiya kanoa eva'yi hie. Ani kanoa Anumaya Koti'ma kava yagaisia kanahe muse huno agava nehia kanogino kolia ohuno Pailatite via'amo mage huno havige “Yisasina augafa'a aligahe nehue.” huno mo havige. <sup>44</sup> Havigegenno Pailati'a “Aupa'a ago falimainegeka nehano? Avo'nio nama'yo aiye.” huno agesa nehavino nago'a ati vayate kava yagaimainea kanohe ke higeno egeno “Yisasi'a ago falimaineo?” huno havige. <sup>45</sup> Havigegenno ati vayate kava kanomo'a “E, ago falimaine.” huno higeno Pailati'a Yosefena mage huno hapaiye “Kanalelagi augafa afa'a moligane.” huno hie. <sup>46</sup> Higeno Yosefe'a via'amo ka'yo muki aya'aya kena molino via'amo augafa yafaga yosaleti alino maleneno kenaleti augafalela aigalaki kalaki huno ha'ya kiteno alino via'amo hefalege'ya kafimalenaya yafakapi Yisasina hevaiteteno avayale'ma aililesia yafana ayetufeno anile mo aililemalene. <sup>47</sup> Magatala Malia'ene Yosefena ita'amo'a Malia'ene maine'ana hevaitea yafa kaana agemaina'e.

# 16

## *Yisasi'a ago falimainefitila hetimaine.*

<sup>1</sup> Sapati yupamo'a ha'no hige'ya Yemesina ita'amo'a Malia'e hamo'amo'a Magatala kumate alagi Salomi'ene Yisasina augafale mana'age masaveteti faletegahe ani masavena ali'ya emainae. <sup>2</sup> Sota yupa yagemo'a yaufa nehaige'ya ani a'neyaga komulega vae. <sup>3</sup> Kategama vayana amakai'amige kea hume hume umainae “Komumo avayale'ma aililemalea yafana ta taya huno avayaletila alino avayu huno faitega atalelategahie?” hu'ya hae. <sup>4</sup> Nehu'ya agesaga hu'ya agayana ani ala yafakefa ago alikelitalageno faitega hanege'ya agemainae. <sup>5</sup> Agete'ya ani yafakapinaga hai fale'ya mogayana nago neyana aya tamaga kaiyaga mopale mainege'ya agayana ani kanomo'a aya'aya efe kena failinege'ya agete'ya tusi'a amama'yo aimainae.

<sup>6</sup> Amama'yo ne'aigeno ani kanomo'a mage huno hie “Tamakaila tamama'yoa o'aino. Tamakaya Nasaleti Yisasife ati ne'ayae. Yafaga yosale nilima he'ya asaimalaya kanohe ati ne'ayayanagi agaya falimainefiti ago hetimaine. Mafina omainegi ani kanoma malaya kumala ma hanegi ageho. <sup>7</sup> Tamakaya utama Yisasi'enema tokae'ya nemaiya anaga'ene Pita'ene mage hutama hamapaiho “Yisasi'a ofalino afa'a maineno'ma tamahapaimainea kemo'a ago uhagotelamateno Kalili umainegi anilega ne'utama Yisasina mogeho.” huno hamanepaiye.

8 Hige'ya amakaya atili hute'ya amama'yo aige'ya yafakapitila hatilavi'ya amaiyaye'ya vayanagi kolima haya yafe nago'a vayala ani kea hamaopinae.

*Magatala kumate Malia'la Yisasina agemaine.*

9 Sota yupa nate alakefafi Yisasi'a falimainefitila hetino via'amo hagoteno Magatala kumate Malia mainelega uva'yi higeno agemaine. Nayona ani a'mo agupina seveni'a (7) Satani Avamula mainegeni Yisasi'a anatitaleneane. <sup>10-11</sup> Ani Malia'la ageteno via'amo Yisasi'enema tokae'ya nemaiya anagala mogeana tusi'la hamau hu'ya avine'atageno ani a'mo'la mage huno mo hamapaiye “Yisasi'a falimainefitila ago hetige'na nagaya agaila ago agete'na ne'oe.” huno hamapaige'ya havite'ya “Havige nehane.” hu'ya amametitia ohunae.

*Agai'la anagapiti tole kanolatamogania katega Yisasina agemaina'le.*

12 Haenaga'la ani vayapitila tolemogania kumala atale'ana katega ne'va'ageno Yisasi'a eva'yi hige'ana agemaina'le. <sup>13</sup> Agete'ana ani kanolatana ete'ana vaya'animo'ya mainalega va'a'amogani “Yisasi'a na'la kano ago'le.” hu'ana mo neha'ana ani vaya'mo'ya “Havige neha'le.” hu'ya havi'ya amametitia ohunae.

*Yisasi'la aleveni'la (11) anaga'amo'ya ali'ya al- isaya ke hamapaimaine.*

14 Haenaga'la aleveni'la (11) anagala kave mai'ya nenageno Yisasi'a eva'yi huno maineno

amakaya vaya'mo'yama haya kemo'a "Yisasi'a falimainefitila ago hetigeta agemainone." hu'ya haya kema havisaya yafena amaku'amo'a ti-lege'ya havi'ya amametitima ohaya yafe Yisasi'a ke memamakie. <sup>15</sup> Kemamakiteno mage huno hamapaiye "Muki'a kotega utama nagai kanale mono kea alitama vea'mogamina mo hama-paiho. <sup>16</sup> Hamapaisage'ya nago'a vea'mo'ya ani kehena "Tamage nehae." hu'ya havi'ya amakupi male'ya amametiti hisagetama tina falemate-sageno Anumaya Koti'a amaku amamena aligati-gahianagi nago'a vea'mo'ya ani kehena 'Hav-ige nehae.' hu'ya havi'ya amakupi omalesaya veafena Anumaya Koti'a 'Hani yapi tegelege ne-hia atafi viho.' huno humategahie. <sup>17</sup> Nagai kema havi'ya amakupi male'ya ametiti hisaya vea'mo'ya ani tokiya'age avame yana huga-hae nagai nagile Kefo Avamula vea amakupitila amanati ne'atale'ya amaku amakesafiti ohavi-nesaya kefitila alu amake alu amakea aiga-hae. <sup>18</sup> Vea'ma akafu ne'amanisia osifa'vema atafa hisayana amaugafa amagata o'aisige'ya ofaligahae. Vaya'ma nefalia posini lima ne-sayana amaugafa amagata o'aisige'ya ofaliga-hae. Kalima ne'aliya vaya'mogami amau-gafale'ma amayama malesageno'a kali'amimo'a kanale humategahie." huno hie.

*Anumaya Koti'a Yisasina avalegeno ikapinaga haimaine.*

<sup>19</sup> Yisasi'a, Anumayatimo'e mani kea hamapaitegeno ikapinaga avalesaga higeno

haino Anumaya Kotina tamaga ayatega umaine.  
20 Umainege<sup>1</sup>ya Yisasi<sup>1</sup>ene tokae<sup>1</sup>ya nemaiya  
anagala muki<sup>1</sup>a kotega ute ete hu<sup>1</sup>ya Yisasi mono  
kea hamane<sup>1</sup>paigeno Anumayamo<sup>1</sup>a amakai<sup>1</sup>ene  
vaiyeno amaya huno tokiya yama<sup>1</sup>aleti “Ani kea  
tamage nehae.” hu<sup>1</sup>ya vea<sup>1</sup>mo<sup>1</sup>ya havisaya yafe  
kasago<sup>1</sup>ya tokiya avame yana humainae. Mani  
kema hua kea tamage.

**Anumayamo'a Haegafa Alino  
Hagelafilatenea Kea  
The New Testament in the Kanite Language of Papua  
New Guinea  
Nupela Testamen long tokples Kanite long Niugini**

copyright © 2002 Wycliffe Bible Translators, Inc.

Language: Kanite

Translation by: Wycliffe Bible Translators

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures. Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2021-04-21

---

PDF generated using Haiola and XeLaTeX on 21 Feb 2024 from source files dated 31 Aug 2023

55807fd5-1005-5405-89da-5533a7950c65